

LUKAQ

é Gabú Danglù Laiká

(The Gospel of Luke)

¹ Aróng wó dik é sù Htohpilug ê, ngamoq chyáng dut láí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kê to bekô nghut ri. ³⁻⁴ Ngò le haú pé banshoq lé awang mai ahpyo hpyot jihkúm nuquq ho myî yù luí, nàng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kê kat byi râ lé, ngò wó myit ri.

Wui-myhup Sará Yohan Hku Lé Lô Râ Gâ É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶ Haú nhik gi, Yhumsîng Garaî é jep é tarâ eq htûngtarâ banshoq lé, rago za cháng mù, Garai Gasâng é hí má dingmán é su nhik nghut akô. ⁷ Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuî, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garai Gasâng é hí má lé zui le, ⁹ haú Yhumsîng é noquq yhûm ahkaû má namngón hkungga ê wang nyhé râ matú, hká yuq nghut râ lé hkyangjong pé é htûngli eq rajung za byù hkyîn shosé she wú é hkûn, yhâng chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyúdûng nyi akô.

¹¹ Haú hkûn, Yhumsîng Garaî é maumang lagyo gi, namngón jung nyhê é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garai Gasang gyo byi bê. Haú mù luí, náng é yhumsîng myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gà le, yhang gi, haú Yhumsîng Garaî é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nû é unghkaû mai yhang, Chyoiyúng Woi-nyí èq byíng nyî râ sù nghut lhê. ¹⁶ Yhang gi, Israelaq yhangzo yhangshû pé myo myo lé, Yhumsîng yhangmoq é Garai Gasâng chyáng lhing lò nhâng râ sù nghut lhê. ¹⁷ Îwâ pé é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyî hkyô shut lhing lò nhâng luí, haú Yhumsîng jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé tái ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngâ é yhumsîng myhí le asak ipyat ko bê." ga luí, maumang lagyo lé tû tái ri.

¹⁹ Maumang lagyo haú gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí tái kyo aq ga luí, Yhang, ngo lé nhang kat é nghut lhê. ²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mù haú dut lo é buinyí jé shoq, nàng gi, nhut jit byuq râ nghut lhê." ga luí,

yhang lé tâ taî ri.

²¹ Haû u, shiwa byu pé gi, Zahkariq noqkuq yhûm ahkaû má haû-í myáng shoq lúng byuq é hkyô lé lág maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haû mù luî, yhangmoq gi, noqkuq yhûm ahkaû má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuî, Zahkariq gi, hkyangjong jong âng é buinyì ngap jáng, yhûm shut dum taû ló byuq bê. ²⁴ Hau htâng má, yhâng é yhumsîng myhí Elizabet gi, zogûng dut lò mù luî, hká le a htoq e za lhamó ngo hkyap yhúmhaû má lúng byuq ri. ²⁵ Haú hkûn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luî, shî su dut nhang é dông mai huî sêng pyám byî é buinyì má, Yhang ge é hkyô lé, ngo lé tân shit bê nghut ri." ga taî ri.

Yesuq Hku Lé Lô Berâ Gâ É Hkyô

²⁶ Ahkuî, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myìng gi, Mariq gâ ri; yhang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haû gi, Mariq chyáng jé jáng, "Mariq ê, nguìngón nyî sháng gaq; Nàng, hkungsô wó nyi ri; Haû Yhumsîng Garai gi, nàng eq rahá nyi nyi ri ò!" ga taî ri.

²⁹ Mariq gi, dang haû lé gyo sing nán mù, shî su gâ é dang gi, haî jung gá naû é nghut lhê lhu ga luî, myit maú nyi ri. ³⁰ Haú hkûn, haû maumang lagyo gi, "Mariq ê, hkâgyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogûng dut lò mù luî, yuqzo rayuq bau râ nghut lhê. Yhâng é myìng lé gi, 'Yesuq' nghû luî, nàng myhíng byi ra râ nghut lhê. ³² Yhang gi, hpung bô

sû dut râ nghut mù, Myhang htáng htúm Su é Yhangzo gà é hui râ nghut lâ. Yhumsing Garai Gasang gi, yhang lé, yhâng é îchyí îwa Dawiq é hkohkâm tanghkuq lé, byi râ nghut mù luî, ³³ Yhang gi, Yakup yhûm* lé hkâ-nhâm le ru-up nyi râ nghut lâ. Yhâng é mingdán le htum nghu é joq râ a nghut." ga luî, yhang lé tâi ri.

³⁴ Haû hkûn, Mariq gi, "Ngò gi, zomyi gyíng ru nghut ashî, haû gi, hkâsu wó dut râ lhú?" ga luî, maumang lagyo lé tû tâi ri.

³⁵ Haû maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luî, haû baû lò râ Chyoiyúng sù le gi, Garai Gasâng é Yhangzo ga kó râ nghut lâ. ³⁶ Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to bê. Ahkuî, zogûng dut é lhamó hkyuq hkyap wàng bê nghut ri. ³⁷ Hkâsu mù gà le, Garai Gasang a wó kut é haî le a joq." ga luî, yhang lé tû tâi ri.

³⁸ Haû hkûn, Mariq gi, "Yhumsing é jùnmyhí ngò nghut nyi lâ; náng é dang eq rajung za ngá chyáng dut lò sháng gaq." ga tû tâi ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huî É Hkyô

³⁹ Hau htâng hkâ-í a myáng má, Mariq gi, Yuda mau bum mau mâ é wà rawà shut hân hân e ló luî, ⁴⁰ Zahkariq é yhûm má wàng mù, Elizabet eq huî nyo lhûm ri. ⁴¹ Mariq é danghtê lé Elizabet wó gyo jáng, yhâng é unghkaû mâ é zoshâng gi, byam chyû lo ri. ⁴² Elizabet le, Chyoiyúng Woi-nyí byíng to mù luî, Mariq lé htê mó èq tâi é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô! ⁴³ Ngá

* 1:33 Yakup yhûm nghu e gi, Israelaq amyû lé gà lâ.

Yhumsing é yhângnu ngá chyáng jé lé é jeju gi, hai é yanmai nghut bê lúhú? ⁴⁴ Wú aq, náng danghtê lé wó gyo kat jáng, ngá unghkaû mâ é zoshâng gi, gabú luí byam chyû nyi ri. ⁴⁵ Haû Yhumsîng taí é dang gi, gè gè dik lò râ nghut lhê ga luí, lumjîng é myiwe gi, hkungsô wó nyi ri." gâ ri.

Mariq É Hkya-on Dang

⁴⁶ Haû hkûn, Mariq gi,

"Ngá é i-myt mai haû Yhumsîng lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yù Sû má gabú nyi lhê.

⁴⁸ Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyí sù, gâ nyí bekô râ nghut lhê.

⁴⁹ hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri, Yhâng é myìng gi, chyoiyúng nyi ri ô.

⁵⁰ Yhang lé gyuq hoq nyí bâng é ahtoq má, Yhang shogyo nhikmyîn é hkyô gi, pyat bán hkangmó jé shoq hkâ-nhám le joq nyí râ nghut lhê.

⁵¹ Yhâng é wum-o bo é loq èq mauhpo mù mó pé lé tân shit bê.

Yhumsîng myit é hkyô má nghutbûn nyi é bang lé, Yhang lhoq pyo pyám bê.

⁵² Zaugun suwún wuî lé gi, zau zûng tanghkuq mai lhoq hkyô pyám mù,

i-myt nyhûm bang lé gi, lhoq myhâng bê nghut ri.

⁵³ Zòmút hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.

⁵⁴⁻⁵⁵ Nga-nhông é îchýí îwâ pé lé tâi tô é dang eq rajung za, Abraham eq yhangzo yhangshu pé lé, hkâ-nhám le shogyo nhikmyîn nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luí, tâi ri.

⁵⁶ Mariq gi, Elizabet chyáng lhamó sum hkyap kô nyi mù luí, yhûm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê. ⁵⁸ Yhang lé haú-í kô é jeju Yhumsíng tân shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akô.

⁵⁹ Ahkuí shit nyi jé jáng, yhangmoq gi, zoshâng haú lé ahyo-kuq hpyit byi râ matú lé kôluí, yhâng wâ é myìng eq rajung za, Zahkariq ga myhíng byi râ dâ akô. ⁶⁰ Nghut kôlhang, yhâng nu gi, "A nghut, Yohan nghû sheq myhíng râ nghut lhê." ga tâi ri.

⁶¹ Yhangmoq gi, "Náng é amyû suisho má le, haú su gâ é myìng rayuq le a bo wú shi." ga luí, yhang lé tâi akô.

⁶² Haú hkûn, zoshâng haú lé hkâsu nghû myhíng nau lhê laq ga, yhâng wa lé loq lik lik shit mù myi akô.

⁶³ Zahkariq gi, kê jung longpá dúng yù mù, "Yhâng é myìng gi, Yohan nghut lhê." ga kê shit ri. Haú mù, lhunglhâng bang gi, maú byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵ Haú su dut é hkyô lé, wó gyô é awui ayàm lhîngghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón tâi pyo ló bum akô. ⁶⁶ Wó gyô é lhunglhâng bang gi,

haú hkyô lé yhumsing é i-myt unghkaú má kat to mù, "Zoshâng shí gi, hkâsu dut lò râ sù nghut lhê lhú?" ga myit wú nyi akô. Haí mù gâ le, haú Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haú Yhumsîng, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyû lé, lé kûm wú mù luí, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú

wum-o bo é hkyi yu é hkyuú† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoí pê é nhut mai taí tô é eq rajung za nghut ri.

⁷¹ Haú hkyuú gi, nga-nhúng lé nga-nhûng é gye pê chyáng mai le, a nguí a naù bang banshoq é loq mai le, hkyi yù râ nghut lhê.

⁷² Îwa Garai gi, nga-nhûng é îchyí îwa pé lé shogyo nhikmyin hkyô lé tân shit râ matú, Yhang byí tô é chyoiyúng dangshikaq lé a tô-myhí nghut ri.

⁷³ Haú gi, nga-nhûng é chyiké Abraham lé byi tô é dang-gidiq nghut lhê.

⁷⁴⁻⁷⁵ Nga-nhúng lé gye pê loq mai hkyi yù râ eq, nga-nhúng asak dui tô é buinyì banshoq má,

Yhâng é hí má a gyuq a kyum é za, chyoiyúng é eq dingmán é hkyô mai,

† 1:69 Hkyi yu é hkyuú gi, Yhumsîng Yesuq lé taí é nghut ri.

Yhang lé wó dojaú nyî nhâng râ matú, Yhang jé lé é nghut lhê.

⁷⁶ Ngá zo ê, nàng gi, Yhumsing é hí má, e ló mù luí, Yhâng é hkyô lé hen lajang byi râ sù nghut é yanmai, nang lé Myhang htáng htúm Su é myiqhtoi ga kó râ nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byî é dong, hkyi yu é hui râ hkyô lé tai kyo râ sù nghut lhê.

⁷⁸ Hái mù gâ le, Garai Gasâng é shogyo nhikmyin é yanmai, napsûn bui[‡] gi, mauhkûng mai nga-nhûng chyáng htoq lé lô râ nghut lhê.

⁷⁹ Yhang gi, mauchut hkaû[§] eq shî wup hkaû má lúng to bang lé builoq su duqbó byi râ eq, nga-nhúng lé nguingón simsaq é hkyô shut shuê e ló râ sù nghut lhê." ga ri.

⁸⁰ Zoshâng haû gi, kô lò mù, woi-nyí wum-o bo lò luí, Israelaq byu pê chyáng htoq shit lo é buinyì jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

¹ Buinyì haú pé má, Romaq hkoséng ming banshoq mâ é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri.

² Jihpán haû lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haû hkûn, byù du jup gi, myìng jihpán kat râ matú, ó le ô é wà shut ló bum akô.

[‡] 1:78 Napsûn bui gâ é gi, Yesuq lé tai é nghut lhê. [§] 1:79 Mauchut hkaû gâ é gi, Garai lé a sé mù woi-nyí má shi tô é bang lé gâ lhê.

⁴ Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut, ⁵ yhang dîng tô é myiwe Mariq eq rahá myìng kat lhóm râ matú jé doq ló akô; Mariq kúm gi, gungloq lai to bê nghut ri. ⁶ Haû Betlehem má nyi tô ashî le, Mariq gi, zo hkû râ buinyì jé mù, zomún yuqzo lé bau bê. ⁷ Yhang gi, zoshâng haû lé panchoq èq htup mù no tso langhkang má lheq tô ri; haî mù gâ le, bíng yhûm má yhangmoq nyì râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuî, haû ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsîng é hpungwup shingkang gi, awui ayàm má duqbang lò luî, yhangmoq gyai gyuq bum akô. ¹⁰ Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê. ¹¹ Hkû-nyì lhê buinyì má, Hkrisduq* nghu é Yhumsîng nghut é hkyi yù Sû gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to láng ra nghut lhê." ga luî, yhangmoq lé tâ ri.

¹³ Haú hkûn jáng yhang, mauhkûng bang rajùm rayò htoq lô mù, maumang lagyo haû eq rahá Garai Gasang lé hkyá-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkang bo nyì sháng gaq ô!
Myigùng htoq má le, Yhang ô nau é byu pé má, nguingón é gi, hkâ-nhám le joq nyì sháng gaq ô!"

* ^{2:11} Grik dong Hkrisduq gâ é gi, xû but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê.

gâ akô.

¹⁵ Maumang lagyô pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuî za Yhumsîng nga-nhúng lé lé shit kyô laî ló bê hkyô lé ê gôn wú sháng." ga luî, rayuq eq rayuq taí lhûm akô.

¹⁶ Hau htâng, yhangmoq gi, hân hân ê luî, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô. ¹⁷ Zoshâng haû lé, yhangmoq myàng kôjáng, zoshâng haû eq séng luî yhangmoq lé, lé taí kyô é dang lé, taí pyô kat bekô. ¹⁸ Wó gyô é bang banshoq gi, haû sau zúng bang taí kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaû má matsîng yù mù luî, nik nik myit wú nyi ri. ²⁰ Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkyá-on kungtôn uchyang dum taû ló bekô nghut ri.

Yesuq Lé, Noqkuq Yhûm Má Shuî E É Hkyô

²¹ Zoshâng haû, shit nyí jé mù ahpýo-kuq hpyit byi râ buinyí má, yhang unghkaû má a lúng shi mai maumang lagyo myhîng tô é myîng eq rajung za, yhang lé, "Yesuq" ga luî, myhîng byî akô.

²² Mosheq é tarâ eq rajung za, yhangmoq é lhoq san lhoq sêng é buinyi byíng jáng, Yhumsîng é tarâ má, "Zomún yuqzo hkangmó gi, haû Yhumsîng é hí má chyoiyúng sù wó nghû râ matú, Yhumsîng chyáng é ap byi râ lhê." ☆ gâ é eq, ²³ "Hpûngkyui razúm, haû a nghut jáng, nghoqmyhû zo í du," ☆ hkungga byi râ lhê ga kê tô é eq

☆ 2:22 Htoq Ló 13:2,12 ☆ 2:23 Nhung 12:8

rajung za, ²⁴ Mariq eq Yosep gi, zoshâng haû lé shui mù Yerusalem wà mó shut ê akô.

²⁵ Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israelaq lé nhik lhoq títng râ ahkýng lé lánng nyi sù nghut ri; haû Chyoiyúng Woi-nyí le, yhâng é ahtoq má nyi nyi ri. ²⁶ Yhang gi, haû Yhumsîng Hkrisduq lé a myang é za, shî râ a nghut, ga Chyoiyúng Woi-nyí èq tân shit tô é hui sù nghut lhê. ²⁷ Yhang gi, Chyoiyúng Woi-nyí èq shui mù, noqkuq yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htúng tarâ eq rajung za kut byi râ matú, noqkuq yhúmhaû má shuí wang ló kôjáng, ²⁸ Simeon gi, zoshâng lé loq èq lhom bún yû mù, Garai Gasang lé hkya-ôn é dang gi,

²⁹ "Yhumsîng ê, náng é danggidiq gi, dik bê nghut ri; hkû-nyí náng é jùn ngò gi, nguingón é èq wó shi ló berâ nghut lhê.

³⁰ Haî mù gâ le, byù lhunglhâng bâng é matú, nàng lajang tô é hkyi yù hkyô lé, ngá myoq èq yhang wó myâng bê.

³¹ Haû gi, byù myû chângjup wó myâng râ matú, nàng lajang to byî é nghut mù,

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taî é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taî he pyám râ kumlhá matú le, hkyin tô é hui sù nghut ri. ³⁵ Haû mù, byù myo myô é unghkaû má,

myit mi-myit lé lhoq htoq shit râ nghut lhê. Náng é myit nhiklhum má, shâm chûn èq htaû kyâng kat é su gâ é lé, nàng hui zo râ nghut lhê." ga taí ri.

³⁶ Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyî pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. ³⁷ Myiwe haû gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkyá-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû ló bekô. ⁴⁰ Zoshâng haû gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhkaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poí jé hkgámó, zàn wui Yerusalem wà mó má ê ê kut akô. ⁴² Yesuq raxe í zân jé jáng, poí haû, ê bo lòm ra htungli joq é eq rajung za, yhangme wui yhanghpe wui doq ló akô. ⁴³ Haû poí buinyi lai luí, dum taû lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyí buigyùm chap sô ló bê htâng má, mung moq wui eq, sê lhûm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e ló bekô. ⁴⁶ Ahkuí, sum nyí nghû râ nyí sheq, noqkuq

yhúmhmaû má, tarâ sará pê é gung gûng má zùng to mù, yhangmoq é dang lé gyo yù luí, dum taù myi myi kut nyi é lé, yhangnhik ê myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tû taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhângnu gi, "Ngá zo ê, haí mù luí ngá-nhik lé isu kut lê lú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lú? mauhkûng mâ é ngá Wâ é yhûm má ngò nyi râ lê le gi, nungnhik a sé kó lú?" ga luí, yhangnhik lé tû taí ri. ⁵⁰ Nghut kôlhâng, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taù jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut laí lò bê hkyô pé banshoq lé, yhâng é myit nhiklhum má matsîng tô ri. ⁵² Yesuq gi, hpaqchyí byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haú mù,

yhang gi, Yodan làng yàm jowò hkgámó má, sô jón wún luí, yubak mara hkyut pyám byí é hui râ matú myit lhíng mù, wui-myhup hkâm* yù râ hkyô lé, hko kyô nyi ri. ⁴Haú gi, myiqhtoi Esai-aq laiká má,

"Haú yoso má, byù rayuq garû taí é htê gi,
'Haú Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuìhkung langhkop hkgámó lé lhoq pyíng ra râ nghut lhê;

bùm eq wingkáng hkgámó lé hpyit pyám ra râ nghut lhê;

agoí aguq é hkyô hkat hkgámó lé lhoq nyhâng ra râ nghut lhê;

ahkung ahkop dut é hkyô hkat hkgámó lé lhoq rhá ra râ nghut lhê.

⁶ Haú hkûn, byù banshoq gi, Garai Gasâng é hkyi yù hkyô lé myàng râ nghut lhê."[†]☆

ga luí, kê tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taí é gi, "Duq htan é lhangmuì amyû pé† ê, jé lô râ yubak dam mai wó hfang lut kó sháng gaq ga, nungmoq lé ó yuq taí pûn é lhú? ⁸ Myit lhíng hkyô eq gingdán é ashi zui keq. 'Nga-nhúng gi, Abraham é yhangzo yhangshû pé nghut lhê.†‡ nghû luí, yhumsing é i-myit unghkaû má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan

* 3:3 Wui-myhup hkâm gâ é gi, baptisma lé gâ é nghut lhê. ☆ 3:6 Esai 40:3-5 † 3:7 Lhangmuì amyû pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri.

htoq kat lhê. ⁹ Ahkuî lháng, Garai Gasang gi, Yhâng é wazung lé haú sikkâm wang pé má tô to bê nghut ri; haú mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê." gâ ri.[§]

¹⁰ Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luî, yhang lé myî akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luî, yhangmoq lé tâ tâ kat ri.

¹² Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lhú?" ga luî, yhang lé myî akô.

¹³ Yhang gi, "Nungmoq hkyui yù râ masat tô é htoq lai shoq hkâyû kó." ga luî, yhangmoq lé tâ ri.

¹⁴ Gyezô pé ra-am le, "Ngamoq gi, hkâsu kut le gè râ lhú?" ga luî, yhang lé lé myî akô.

Yohan gi, "Ó lé le hkâkyuq zo ko; a tara é đông mara le hkâhûn kó; nungmoq wó e ahpâu èq gé bûn nyî keq." ga luî, yhangmoq lé tâ ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaû má myit wú nyi bum akô.

¹⁶ Haú hkûn, banshoq bang lé Yohan tâi é gi, "Ngò gi, nungmoq lé, wui èq za wui-myhup hkâm byî lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyî-tsung tui lé hpyî râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê.

¹⁷ Yhang gi, loq má byò chung to mù, guq chyarâng mâ é guq bùm lé hik sân pyám luî, já é guq cham lé gi, guqchyî

§ 3:9 Bun zo shí lhûm é lichyúm gi, myit a lhîng bang lé, Garai Gasang jéyáng é buinyî jé râ nghut lhê ga naû é nghut ri.

má tsing kat to mù, guqsôm lé kúm gi, hkâ-nhám le shi byuq a sê é myî eq nyhê hkyô pyám râ nghut lhê." gâ ri.*

¹⁸ Haû mù, Yohan gi, byù haú bang lé gotû dang myo myo eq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhâng, hkâ-myhâng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara haú pê htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng bóng lô mù, ²² haû Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai dangtê htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo,

* ^{3:17} Haû eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é

yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taû lo é hkûn, Chyoiyúng Woi-nyí gi, Yhang lé yoso shut shuî e ri. ² Haú má, Yesuq gi, buinyì myi xê nyí jé shoq, nat Tsadán èq gunlaú é huî ri. Buinyì haú gyoro má, Yesuq gi, haî le a zô é yanmai, zòmut hui bê nghut ri.

³ Haû mù luî, nat Tsadán gi, "Nàng, Garai Gasâng é Yhangzo nghut le gi, luqgok shî lé muk dut nhâng aq." ga luî, Yhang lé taî ri.

⁴ Haú hkûn, Yesuq gi, "'Byù gi, muk èq za asak duì rà a nghut.' ga luî, Chyúmdang má kê tô ri."☆ ga yhang lé tû taî ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuî doq ló mù, mingkan má joq é mingdán pé banshoq lé razup má za tûn shit luî, ⁶ "Shî ahkáng ayá banshoq eq haû mingdán é hkikhkâm hkyô banshoq, ngò nang lé wó byî lhê; hkâsu mù gâ le, haú pé banshoq gi, ngo lé ap byî to bê nghut mù, ngò byí nau é sù ó yuq lé nghut kôlhang, byi rà nghut lhê. ⁷ Haû mù, Nàng, ngo lé noq é nghut jáng, shí pé banshoq Náng é dut rà nghut lhê." ga, Yesuq lé taî ri.

⁸ Haú hkûn, Yesuq gi, "'Haû Yhumsîng náng é Garai Gasang lé za, nàng noqkuq dojaú ra rà nghut lhê.'☆ ga luî, Chyúmdang má kê tô ri." ga luî, yhang lé tû taî ri.

⁹ Nat Tsadán gi, Yesuq lé Yerusalem wà mó má shuî ê mù, noqkuq yhum je myhang é shûhtâng htoq má yap nhang to luî, "Nàng, Garai Gasâng é Yhangzo nghut le gi, shî mai byam gyó kat wú aq. ¹⁰ Hkâsu mù gâ le,

☆ 4:4 Tarâ Pun 8:3 ☆ 4:8 Tarâ Pun 6:13

'Nang lé upzúng byî rî matú, Garai Gasang gi, Yhâng é maumang lagyô pé lé taí to rî nghut mù,

¹¹ luqgok má náng é hkyî a ló htung shoq, yhangmoq é loq éq Nang lé lhom bún yû kó rî nghut lhê.[☆] ga luí, Chyúmdang má kê tô ri." ga taí ri. ¹² Nghut kôlhâng, Yesuq gi, "Haû Yhumsîng, nungmoq é Garai Gasang lé, wó chyam wú rî a nghut.[☆] ga luí, Chyúmdang má bo tô ri." ga, yhang lé tû taí ri.

¹³ Nat Tsadán gi, gunglaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é éq Galile mau shut dum taû lo ri. Haû mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkya-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taû jé ló bê; Yhang gi, hkâ-nhám le kut nyi é eq rajung za, Bánno buinyi^{*} lé tarajong má wang ê mù, laiká nghap rî ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haû lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri; hkâsu mù gâ le, asho awuí é bang lé gabú danglù hkô kyo rî matú, Yhang ngo lé hkyin yù bê.

☆ 4:11 Hkya-on 91:11-12 ☆ 4:12 Tarâ Pun 6:16 * 4:16 Bánno buinyi gâ é gi, Yudaq byu pé nòmù é buinyi lé gâ lhê. Ahkui lhê é dông ga jáng, Bánno buinyi gi, bat htoq hkyuq nyí lé âng ri.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le,

zik zo huí é bang lé nhang kat nhâng râ eq,

¹⁹ Yhumsîng, Yhâng é byu pé lé hkyi yù râ ahkyíng zanwut lé hkô kyo râ matú le, Yhang, ngo lé nhang kat bê nghut ri."☆

ga luí, kê tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuî-u sù lé tau byí pyám luí, dum zung tô ri; tarajong mâ é byù lhunghâng bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

²² Lhunghâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lhú?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.' † gâ é sanghkyang eq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhâng, haú ming má súm zan eq lhamó hkyuq hkyap yhang, mau a wò dut byuq

☆ 4:19 Esai 61:1-2 † 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauho mù wó tân shit râ nghut lhê." gâ é nghut lhê.

mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byî é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sânyúng yù kô é a nghut; Suriq byù Naman ga sù tûngbaù hpó za sheq wó sânyúng é nghut lhê." ga taî ri.

²⁸ Tarajong hkaù mâ é lhunglhang bang gi, haù hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám râ ga shuî e ló akô. ³⁰ Nghut kôlhang, Yesuq kúm gi, byù hpûng haù mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htâng, Yesuq gi, Galile mau mâ é Kaperna-um wà má jé é mù, Bánno buinyi má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taî nyi é yanmai nghut ri.

³³ Yesuq, tarajong hkaù má mhoqshit byî nyi é hkûn, nat gang wang júng é byù rayuq htê mó o mó èq taî é gi, ³⁴ "Ê, Nazaret wà byù Yesuq ê, ngamoq gi, Nàng eq haí sêng lhê lhu? Ngamoq lé lhoq hten râ matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haù hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haù yuq le yhangmoq é gung gûng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haû mù luî, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lhú? Yhang gi, ahkáng ayá eq le, wum-o bo é eq le, agè ashop é nat pé lé hkunmó hkyó jáng, haú bang htoq ló byuq akô." ga taî lhûm bum akô. ³⁷ Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taî pyo hû ló bûm bekô nghut ri.

Yesuq Nòhpyo Lhoq Gê Byî É Hkyô

Mht 8:14-17; Mrk 1:29-34

³⁸ Yesuq gi, haû tarajong mai toq ló mù, Simun é yhûm má wang ló ri. Simun é yhâng-aumó gi, ali gyai nyé no nyi é nghut mù luî, lhoq gê byî râ matú, Yesuq lé garúm dung byî akô. ³⁹ Yesuq gi, Simun é yhâng-aumó nàm má yap to mù, nòhpyo haû lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglháng lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luî, lhoq gê byî ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luî, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaû má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkûm wú akô. ⁴³ Nghut kôlháng, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haû é matú, Garai Gasang gi, ngo lé nhang kat bê nghut lhê." ga luî, yhangmoq lé taî ri. ⁴⁴ Haû mù, Yesuq gi, Yuda mau mâ é tarajong pé má, hko kyô wún nyi ri.

5

*Sâng-hi Ji Yù Huí É Chángzô Pé**Mht 4:18-22; Mrk 1:16-20*

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkûn, ² nhông gin-gau yàm má lhaî razúm joq tô é lé, Yhang myang kat ri. Ngogûn dú bang kúm gi, lhaî mai htoq mù, yhangmoq é gùn pé lé chî nyi akô. ³ Yesuq gi, Simûn é lhaî má wàng mù gin-gau mai rachyit lhoq kang nhâng luî, haû lhaî htoq má zung to mù, shiwa byu pé lé mhoqshit tâi kyô nyi ri.

⁴ Dang ban tái jáng, Yesuq gi, Simun lé, "Wuî nik é shut hui luî, ngozo wó kông yù râ matú, nungmoq é gùn pé lé dú hkyô kat keq." ga tâi ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haî le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tû tâi ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô râ su dut é yanmai, ⁷ lhaî gó lhum mâ é luzúm wuî lé, lé garúm yù râ matú loq lik lik kat kôjáng, haû bang lé lô mù, haû lhaî í lhum aluq myup lô shoq ngozo lé kat pyíng bekô.

⁸ Simun Petruq gi, haû lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai lô byuq aq, haî mù gâ le, ngò gi, yubak dap é byù nghut nyi lhê." ga tâi ri. ⁹ Haî mù luî gâ le, Simun le, yhang eq nyi tô é lhunglhang bang le, haû su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haû su chôm maú byuq akô.

Hau htâng, Yesuq gi, "Hkâgyuq, ahkuî mai nàng gi, byù lé châng kóng sù dut râ nghut lhê." ga luî, Simun lé tâi ri.

¹¹ Yhangmoq gi, wuiyàm má jé jáng, lhaî pé eq yhangmoq

é zè banshoq lé tô pyâm to luî, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byî É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé ê záng luî, "Ngò dóng lhê, sân-yúng aq hkoi." ga taî ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taî hkûm kat ri.

¹⁵ Nghut kôlhang, Yesuq é hkyô gi, je riyhang taî pyo hû jam ló mù luî, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byi nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq ê mù, kyû ê dung dung kut ri.

Gùngjum Shî Sû Lé, Yesuq Lhoq Gê Byî É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaî é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shî sû rayuq lé taphkang mai waq lé lô kômù, haú yuq lé, yhúmhaû má nyi tô é Yesuq é hí má, wó lheq byi shoq ga

hkyô ho nyi akô. ¹⁹ Byù lûm myô chyên chyap to mô, haû nô sù lé hká dông le a wó shuí wàng kôluí, haû yhumhkông htoq shut waq doq ló mù, haú yuq lé taphkang eq roq, shiwa hpong gung gông, Yesuq é hí ang ang má hkyô hang kat akô.

²⁰ Yesuq gi, yhangmoq é lumjîng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shî su ga luí, Garai Gasang lé rhoi dang taí é sù gi, ó yuq wá nghut lhê lhú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit sôn wuî nyi bum akô.

²² Yesuq gi, yhangmoq myit sôn wuî nyi é hkyô lé sé mù, "Nungmoq é i-myit hkaû má, haî mù shí pé lé myit sôn wuî nyi akô lhú? ²³ 'Náng é yubak mara lé hkyut pyám byi bê.' nghû taí râ eq, 'Toq luí, hkyô so aq.' nghû taí râ má, hká hkun je taí lui lhê lhú? ²⁴ Nghut kôlhang, haû Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haû gùngjum shî sù lé, "Ngò, nàng lé taí bá, toq aq, náng é taphkang yu chûng luí, yhûm taû ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm shut Garai Gasang lé hkya-on kungtôn uchyang ló byuq bê. ²⁶ Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akô.

* ^{5:24} Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú mâ é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhûm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hûn dang taí akô.

³¹ Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru râ lhê. ³² Ngò gi, dingmán bang lé wut yù râ matú jé lé é a nghut, yubak dap bang myit lhâng râ matú sheq jé lé é ru nghut lhê." ga tû taí ri.

Zoshuq Gám Hkyô Eq Séng Luí, Yesuq Taí É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lhú?" ga Yesuq lé taí akô.

³⁴ Yesuq, yhangmoq lé tû taí é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lhú? ³⁵ Nghut kôlhang, lusik† lé yhangmoq chyáng mai shuî yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

† 5:35 Lusik gâ é gi, Yesuq lé taí nau é nghut lhê.

³⁶ Dangtú dông mai le, Yesuq, yhangmoq lé taí é gi, "Mebu sik mâ é lãng cheq yû mù, mebu xau má hpo é gi, ó a kut wú kó; haû su kut é nghut jáng, mebu sik lé le lãng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htông axau má ó a kat wú kó. Kat é nghut jáng, tsibiyiq wing asik gi, htông lé lhoq buq goq nhâng mù, tsibiyiq wing le yui shun byuq, htông le htên byuq, dut râ nghut lhê. ³⁸ Haû su a dut shoq gi, tsibiyiq wing asik lé, shokuq htông asik má kat ra râ nghut lhê. ³⁹ Tsibiyiq wing axau shuq nyî bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga taí râ." gâ ri.

6

Bánno Buinyì Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyì ra-nyí má, Yesuq gi, Yhâng é chángzô pé eq yò hkaû mai sô lâi ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô. ² Haû mù luî, Hparishe pé ra-am gi, "Bánno buinyì má a ge kut jung lé, nungmoq gi, haî mù luî haû su kut akô lú?" ga taí akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmút huî é hkûn, hkâsu kut é hkyô lé, nungmoq a nghap wú kó lú? ⁴ Dawiq gi, Garai Gasâng é yhûm* hkaû má wang ê mù, hkyangjông pé mai lai luî, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lú?" ga tû taí ri. ⁵ Hau htâng, Yhang gi, "Haû Byu Yhangzo gi, haû Bánno buinyì é Yhumsîng nghut lhê." ga yhangmoq lé taí ri.

* 6:4 Garai Gasâng é yhûm nghu é gi, Yerusalem wà mó má joq é saksé zúm lé gâ é nghut lhê.

Loq Jum Shî Sû Lé Yesuq Lhoq Gê Byî É Hkyô
Mht 12:9-14; Mrk 3:1-6

⁶ Gotû Bánno buinyî má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyî má nõhpyo lhoq gê byi râ lhu ga luî, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myt lé sé sù nghut luî, loq jum shî sù lé, "Toq mù, banshoq bâng é hí má, yap shit aq." ga taî kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myî wú kôlé, Bánno buinyî má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhu?" ga luî, yhangmoq lé taî ri.

¹⁰ Hau htâng má, yhangmoq banshoq lé lhing wú mù, haú loq jum shî sù lé "Náng é loq nyhang kat aq." ga taî kat é hkûn lé, yhang le loq nyhang kat luî, yhang é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naú kômù luî, "Yesuq lé hkâsu wá kut pyám râ lhu?" ga luî, rayuq eq rayuq taî lhûm nyi akô.

Raxe Í Yuq Lé Lagyo Ga Myhîng Yu É Hkyô
Mht 10:1-4; Mrk 3:13-19

¹² Haú yoq ra-nyí má, Yesuq gi, kyûdung râ ga bùm shut htoq e ló luî, ra-myin mau Garai Gasang lé kyûdûng nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luî, lagyo pé ga myhîng to byî ri. ¹⁴ Haú bang gi, Yesuq eq Petruq ga myìng myhîng byî é Simun eq, yhanggu Andre, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe

é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aù ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huì é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

²⁰ Haù hkûn, Yesuq gi, Yhâng é chángzô pé lé wú kat lú tái é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuî, zòmút wuìshit huì nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

Ahkuî, ngau nyì bang nungmoq gi, hkungsô wó nyi ri, hkâsu mù gâ le, nungmoq myang wuì kó râ nghut lhê.

²² Haù Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

† 6:15 Zelutuq gâ é lichyúm gi, yhumsîng zui saì é hkyô má gyai yhang myit lòm shirong é sù lé ga lhê. Haù u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. ‡ 6:20 Garai Gasâng é mingdán gâ é gi, Garai Gasang up é lé gâ lhê.

agè ashop nghut é dong jihpoi gamhkui huí é hkûn,
nungmoq gi, hkungsô wó nyi ri.

²³ Haú hkûn lé, gabú byam chyû nyi keq, hkâsu mù gâ le,
wú keq, nungmoq é matú kô é chyunghuq gi, mauhkûng
mingdán má joq tô ri. Ngò, nungmoq lé taí lhê, hkâsu mù
gâ le, yhangmoq é îchyí îwa pé le myiqhtoî pé[§] lé haú su
kut wú bekô."

²⁴ Nghut kôlhang, sùt wó bang nungmoq gi, dingnyé wó
râ, hkâsu mù gâ le, nungmoq gi, yhumsing gùng
má nhik shî nhik dik é hkyô lé huí yù bekô.

²⁵ Ahkuî, gyi gyi dau dau myàng zo myàng shuq nyi é
bang nungmoq gi, dingnyé wó râ, hkâsu mù gâ le,
nungmoq zòmút wuìshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu
mù gâ le, iyon yôn é eq ngaubyi ngau-nhap htoq é
hui kó râ nghut lhê.

²⁶ Byù banshoq bang, nungmoq lé ge é byù ga kôjáng,
nungmoq gi, dingnyé wó râ,

hkâsu mù gâ le, yhangmoq é îchyí îwa pé le, myiqhtoî
pyoq pé* lé, haú su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò
taí kôlé, nungmoq é gye pé lé chyitdap nyi keq; nungmoq
lé a naù a wôm é bang lé ge é hkyô kut keq; ²⁸ nungmoq lé
nhîng é bang lé, shimân byi keq; nungmoq lé rhoi é bang lé
kyûdung byi keq. ²⁹ Nang lé bo-pyuq rahkyam shut pyuq
byi sù lé, rahkyam dum hkâm byi shi aq; náng bumó hkyut
yu é sù lé, buzo le dum hkyut byi shi aq; ³⁰ nang lé rajung

§ 6:23 Myiqhtoî pé le zing-ri huí é yanmai, yhangmoq chyunghuq wó nyi
akô. Haú eq rajung za, jamjau huí é bang nga-nhúng le chyunghuq wó râ
nghut lhê. * 6:26 Myiqhtoî pyoq pé gi, Garai Gasang jéyáng é hui râ.

jung dúng é sũ lé le, byî pyám aq; náng zè yu pyám byî é su chyáng mai le, hkâdúng yù lo. ³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó râ l hú? Yubak dap bang le, yhumsîng lé chyitdap é bang lé gi, chyitdap nyi akô. ³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ l hú? Yubak dap bang le haũ su kut nyi akô. ³⁴ Supé lé zè chyî byî le, dum wó tau byi râ su dut é bang lé za, chyî byî le gi, nungmoq é matú hai akyû bò kó râ l hú? Yubak dap bang l háng chyî byî é myhó dum wó yû shoq, yubak dap é bang lé chyî byî akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byî nyi keq. Dum wó taũ yù râ lé myoq a byu é za, chyî ngho byi keq; haũ su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é îwa Garai Gasang shogyo nhikmyin sê é su, nungmoq le shogyo nhikmyîn nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haũ jáng, nungmoq le jéyáng é a hui kó râ nghut lhê. A doqdân é za nyi keq; haũ jáng, nungmoq le doqdân é a hui kó râ nghut lhê. Mara hkyut byi keq; haũ jáng, nungmoq le mara hkyut byî é hui kó râ nghut lhê. ³⁸ Byi keq, haũ jáng, nungmoq le dum byî é hui kó râ nghut lhê. Mán é búng mai byíng mui shûn shoq nhûn chyîng, dùn chying kat mù, nungmoq é tanghkoí hkaũ má lik kat byî é hui kó râ. Hkâsu mù gâ le, nungmoq lik byî é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tân shit lhê lhú? Yhangnhik í yuq é donghkong má byit gyó kó râ nghut lhê, a nghut kó lhú?" ⁴⁰ Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm[†] lé lháng a myit wú é nhîng, haî mù luî, nunggu nungmâng é myoqwàng[‡] lé myang lhê lhú? ⁴² Yhumsîng é myoq má lúng tô é siktúm lé lháng a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taí râ lhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, náng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashî zuî é, ge é shigâm hkâmá le a joq. Ge é ashî zuî é, a ge é shigâm le a joq. ⁴⁴ Haû mù luî, shigâm hkanqmó lé, zuî é ashî lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zogyóm mai le tsibiyiq shi a wó hpyoq yu wú. ⁴⁵ Ge é sù gi, yhumsing é i-myt unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaû mâ é agè ashop é sutdò mai, agè ashop é zè pé lé lhoq htoq shit lhê. Haî mù gâ le, yhâng é i-myt unghkaû má byíng mui tô é lé za, yhâng é nhut mai taí htoq lo é nghut lhê.

[†] 6:41 Siktúm nghu e gi, yubak mara kô é lé taí lhê. [‡] 6:41 Myoqwàng nghu e gi, yubak mara atiq azo lé taí é nghut lhê.

Lughtëan Htoq Má Yhûm Saí Sû Eq Myì Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lhang a wó châng kut kô é nhîng, haí mù luí, nungmoq Ngo lé 'Yhumsîng ê, Yhum-sîng ê.' nghu nyi akô lhu? ⁴⁷ Ngá chyang lé mù, ngá dang gyô yù luí, châng kut é sù ó nghut kôle, hkasû é sù eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtëan htoq má apûn awang hi é sù eq wuí lhê. Wuì jê lò luí wuibaù pê èq yhûm haú lé lo gùn kôlhang, ging ging tíng tíng saí to bê nghut luí, haú lé a wó gun nhún. ⁴⁹ Ngá dang gyô yù mù, a châng sù gi, apûn awang a saí é za myì chîn dum má wahpang yhûm saí sù eq wuí nyi ri. Wuìbaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuì a bò loshoq dut byuq rá nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyang jê ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; ⁵ hkâsù mù gâ le, yhang gi, nga-nhûng amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dîng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuî lé taí nhang kat é gi, "Yhumsîng Yesuq ê, náng gûng lé hkâlhoq hkyik lo. Nàng, ngá é laishîn-htâng má, lé nang râ lháng ngò má a gingdán. ⁷ Haú mù, ngò, náng chyáng jé lé râ matú gingdán é sù a nghut; Nàng, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luî, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shî í lumjîng é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. ¹² Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haú eq rahá châng lé lo akô. ¹³ Yhumsîng gi, haú chuimó myhî lé myàng jáng, yhang lé wú shogyo luî, "Hkâ-ngaú." ga taí ri.

¹⁴ Yesuq gi, gung shut huî ê mù, loq èq ê záng kat ri. Haú hkûn, waq tô é bang le jâng yap to byî akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byî ri.

¹⁶ Byù lhunglhâng bang gyuq maú bùm kôluî, Garai Gasang lé hkya-ôn é dang gi, "Myiqhtoi mó, nga-nhông chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô.

¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô. ¹⁹ Haú mù luî, Yohan gi, yhâng é chángzo í yuq lé ji yù mù, haú Yhumsing chyáng nhang kat luî, "Nàng gi, haú jé lé lô râ Sû nghut lhê lhú? Haú a nghut jáng, ngamoq, góyuq lé lán ra shirâ lhú?" ga, myí nhang kat ri.

²⁰ Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lhú? Haú a nghut jáng, ngamoq góyuq lé myoqbyu lán nyî ra shirâ lhú?" ga luî, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huî é bang eq agè ashop é nat dap jun dap é byù myo myo lé, lhoq gê byî ri. Myoqjit bang myo myo lé le, myoq dum myàng nhang ri. ²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyî bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htâng má, Yesuq gi, Yohan eq séng luî, byù moq mó lé taí é gi, "Nungmoq gi,

haî lé hpuq wú râ matú, haû yoso shut e akô lhú? Lai èq hik nhûn é jamgàm lé wú râ matú nghut akô lhú? ²⁵ Haû a nghut jáng, haî lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut! Wú keq, gyai hpaû é mebu wut luî agùn agó wó bang gi, hkohkâm-wâng pé má sheq ru nyi lê. ²⁶ Haû nghut le gi, haî lé wú râ matú ê kô é lhú? Myiqhtoï rayuq lé lhú? Haû kúm nghut ri. Ngò, nungmoq lé taí kôlé, Yohan gi, myiqhtoï htoq lháng gyaú sù nghut lê. ²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang láng râ matú, Ngá é lagyo lé,

Náng é hí má Ngò nhang kat râ nghut lê.[✠]

gâ ri. ²⁸ Ngò, nungmoq lé taí kôlé, myiwe wuî mai hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lê." gâ ri.

²⁹ Mingbyû lunglhang bang eq kang guq bang gi, dang haú pé lé wó gyo kôjáng, Yohan byî é bap̄tisma lé hkâm yù kô é nghut mù luî, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byî é bap̄tisma a hkam yù kômù luî, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taí é gi, "Haû mù luî, byû myû shî lé, Ngò, hai èq taí kê wú râ lhú? Yhangmoq hai eq wuî akô lhú?

³² Yhangmoq gi,

'Nungmoq é matú, ngamoq sampyí mut byi kôlháng, nungmoq gi, a gó kó,

ngamoq ngàu hkyangsâng kôlháng, nungmoq gi, a ngàu kó.'

ga luî, gài pé má zùng uchyang rayuq eq rayuq wut taí lhûm nyi é zoshâng wuî eq wuî akô. ³³ Hkâsu mù gâ le, Wui-myhup Sará Yohan jé lé luî, muk a zo, tsibiyiq a shuq

✠ 7:27 Mal 3:1

é nyi le le, 'Yhang gi, nat gang dap sù nghut ri.' ga luí, nungmoq taí akô. ³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. ³⁵ Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byí nyi akô."* gâ ri.

Yubak Dap É Myiwe Rayuq, Yesuq Lé Xû But Byí É Hkyô

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri. ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xû bo é luq hpyû bông yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyí èq záng lhoq teq byi jáng, ûxam èq but sut pyám byí ri. Dum nghut jáng, nhut èq puq luí mura lé but byí ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsû é yubak dap é myiwe nghut é lé, Yhang sé râ nghut lhê." ga luí, yhâng é unghkaú má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín

* 7:35 Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkám nyi akô. † 7:41 Denari rachap gi, ra-nyí lhê é byù rayuq é zuihpau eq wú ri.

xap rã ngùn a wó kôluî, chyîn yhumsîng gi, yhangnhik lé xap a ra lò gâ pyâm ri. Haû mù luî, haû nhik mâ é hká yuq gi, yhang lé je chyitdap rã lhú?" ga myî ri.

⁴³ Simun gi, "Je myo lhoq lhut hui sũ, nghut rã su ngam ri." ga tũ taî ri.

Yesuq gi, "Nàng myit e dông jô ri." ga taî ri.

⁴⁴ Haû hkũn, Yesuq, myiwe zo haû lé lhing wũ luî, Simun lé, "Nàng myiwe zo shí lé myang lhê lhú? Ngò, nàng é yhũm má wang le, hkyî chi rã uchyam, nàng a byi, yhang kúm gi, ngaubyî èq ngá hkyî lé tik byi luî, yhâng é xam èq sut pyám byi bê. ⁴⁵ Nàng gi, ngo lé nhut èq a puq nghut ri; yhang kúm gi, ngò yhũmhkaû má wang é mai ngá hkyî má a no loshoq puq nyi rã. ⁴⁶ Nàng gi, ngá ulhum má xũ a but byi wũ, yhang kúm gi, ngá é hkyî má nãm ngón é mura but byi bê nghut ri. ⁴⁷ Haû su mù, ngò, nàng lé taî lé, haû myiwe gi, je chyitdap luî, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sũ gi, shau za chyitdap sũ nghut ri." ga taî ri.

⁴⁸ Yesuq gi, myiwe haû lé le, "Ngò, nàng é yubak mara hkyut pyám byi bê." ga taî ri.

⁴⁹ Rahá zung tô é bang gi, "Yubak mara lháng wó hkyut pyám byi sũ, shí yuq gi, ó wá nghut lhê lhú?" ga luî, myit nyi bum akô.

⁵⁰ Yesuq gi, "Nàng é lumjîng myit èq nang lé hkyi yũ bê, ngón za lô aq hkoi." ga luî, myiwe haû lé taî kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglũ lé taî kyo uchyang, Yhâng é lagyo raxe í yuq eq rahá za, rawa htâng rawà jé e lô ri. ² Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit

nat lhoq htoq pyám byi huí é, Magadalaq wà mâ é Mariq le, ³ Herut é ikun zum sù Kuza é yhumsîng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyô pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkgang wà mó mâ é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú dông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nâng pyeq pyâm lhê, maulat nghoq pê èq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlhang, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

⁹ Haú hkûn, Yhâng é chángzô pé gi, dangtú shî hai lichyúm nghut lhê lhú ga, Yhang lé myí akô. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbâng matú gi, 'Wú to kôlhang, a myàng kó sháng, gyô nyi kôlhang, a sê gyo kó sháng.'[☆] nghû, ngò dangtú dông taí lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê.

☆ 8:10 Esai 6:9

¹² Hkyô má gyó âng é kyôshi gi, haî eq wuí lhê lhú gâ le, haû mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luî, yhangmoq é i-myt hkaû mai nat Tsadán èq mungdang haû lé, lé yu pyâm é hui bang eq wuí lhê. ¹³ Luqgok yò pé má gyó âng é kyôshi gi, haî eq wuí lhê lhú gâ le, haû mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjîng luî, gunglau huî é nyí má, dum htak ló byuq é bang eq wuí lhê. ¹⁴ Zugyóm má gyó âng é kyôshi gi, haî eq wuí lhê lhú gâ le, haû mungdang lé gyô yù luî, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luî, mo é ashi a zuî é bang eq wuí lhê. ¹⁵ Hpún bo é myigùn má gyó é kyôshi kúm gi, haî eq wuí lhê lhú gâ le, haû mungdang lé lhumzui luî ge é i-myt èq ban gyô yù mù, ging tíng shoq zuî zìng luî, wó jân é i-myt èq ashi zuî é bang eq wuí lhê.

Myibung Htûn É Hkyô

Mrk 4:21-25

¹⁶ Myibung lé tap mù, aû èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haî le a joq, a sé a byông htoq loshoq wó zaú tô é zè le haî a joq nghut ri. ¹⁸ Haû mù luî, nungmoq hkâsu wó gyô yu é hkyô lé sidiq nyì keq, haî mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lháng, yu pyám byi shirâ nghut lhê." ga taî ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù,

Yhâng chyáng a wó wang ê kó nghut ri. ²⁰ Haú hkûn, Yhang lé, "Náng nu eq nunggu pé gi, nang lé hui naú luí, shinggan má láng yap bum akô." ga taí kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tû taí kat ri.

Laidun Mó Lé Yesuq Lhoq Zîm É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taí luí, lhaí má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhaí má wui byíng lô mù, yhangmoq myup shî râ su dut lò nyi bekô nghut ri.

²⁴ Haú mù, yhangmoq gi, Yesuq chyáng huí ê luí, Yhang lé nhaú pun mù, "Yhumsîng ê, Yhumsîng ê, nga-nhúng myup ló nyi ri." ga taí akô.

Haú hkûn, Yhang toq luí, laidun eq wuìlhêng pé lé tân kat jáng, haú pé gi, zim za dut ló byuq bê. ²⁵ Haú mù, Yesuq gi, "Nungmoq é lumjíng myit gi, hkâmá nghut akô lhuí?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasû é byù nghut lhê lhà? Yhang hkunmó hkyó jáng, lài eq wuìlhêng pé lháng gyo byi ri-nhung!" ga luí, rayuq eq rayuq myí lhûm bum akô nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pé é mau má jé dap e ló bekô. ²⁷ Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri.

²⁸ Haú yuq gi, Yesuq lé myàng jáng, wut garu luí, yhang é hkyî wang má paí gop to mù, "Myhang htâng é Garaí Yhangzo Yesuq ê, Nàng gi, ngò eq haí séng lhê lhú? Ngo lé a zing-ri râ matú, ngò nang lé dúng nyi lhê." ga luí, htê mó eq taí garú nyi ri. ²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng eq adàm dàm wang júng hkanmó, loq eq hkyî má toqjâng tuí eq tuí shung, kyum xâng tô é eq, zúng tô é nghut kôlháng, lêng hpyit pyám pyám kut é htoq ago, nat gâng eq yhang lé yoso hkaú shut lêngmháp yù yù kut nyi ri.

³⁰ Yesuq gi, yhang lé, "Náng myîng haí gâ lhê?" ga myí kat é hkûn, yhang gi, "Legio* gâ lhê." ga tú taí ri. Haí mù gâ le, yhang chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htúm é Lasang-dong shut a kôn kat râ matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pê chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pê chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpanjang ló kômù, myuq hkaú mâ é bang eq awui ayàm mâ é bang lé ló taí kyô akô nghut ri. ³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luí, byù gè rayuq su

* 8:30 Legio gâ é lichyúm gi, gyezo 4000 eq 6000 gyoro bo é gyedap lé taí ri.

zùng to lánq é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri. ³⁷ Haú hkûn, Gerase byu pê é mau mâ é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chôm dúng tôngbán akô. Haú mù luí, Yesuq gi, taú ló byuq râ matú lhaí má wàng bê nghut ri.

³⁸ Nat htoq byuq huí é sù gi, Yesuq htâng cháng râ matú, Yesuq lé dúng tôngbán ri. ³⁹ Nghut kôlháng, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

Ya-iruaq É Yhangzo Byzô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò râ lé lánq nyí kô é nghut mù, Yhang dum taú gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyô wang má hkyihput htuq luí, yhâng yhûm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô. ⁴³ Haú u lé, raxe í zân sui yuí luí ngunzè lhunglháng ban pyám shoq chi sará pê chyáng yâ wú kôlháng, hká yuq le a wó yâ gè byi é† myiwe myhí rayuq le haú hkaú má bo tô ri. ⁴⁴ Myiwe haú gi, Yesuq é

† 8:43 Ngunzè lhunglháng ban pyám shoq chi sará pê chyáng yâ wú kôlháng, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

nunghtáng má huí lé mù, Yhâng é bushi htâng má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lhînghkyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?" ga tâi ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga tâi ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyí wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byu banshoq bâng é hí má Yesuq lé tâi kyô nyi ri. ⁴⁸ Yesuq gi, "Ngá zo ê, náng é lumjîng myit gi, nang lé lhoq gê byi bê nghut ri, ngón za ló aq hkoi!" ga luí, myiwe haú lé tâi kat ri.

⁴⁹ Yesuq gi, dang ru tâi nyi ashî hkûn, tarajong má up sù Ya-iruiq é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyî lo." ga luí, Ya-iruiq lé tâi kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjîng aq, haú jáng, yhang ge byuq râ nghut lhê." ga luí, Ya-iruiq lé tâi ri.

⁵¹ Yesuq gi, Ya-iruiq é yhûm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luí, yhûm haú má, ó lé le a wàng nhâng kut ri. ⁵² Haú u lé, lhunglhâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkâ-ngaú kó, yhang shi byuq é a nghut, yhup myhí tô é sheq ru nghut lhê." ga luí, yhangmoq lé tâi ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byî akô. ⁵⁴ Yhang kúm

gi, myiwe zo hau é loq má zuî to mù, "Zoshâng ê, toq aq." ga taî kat ri. ⁵⁵ Haû mù luî, yhâng woi-nyí dum taû wàng mù, haû hkûn jáng toq yap ri. Haû jáng, Yesuq gi, zoshâng haû lé zôjung byi keq, ga yhangmoq lé taî kat ri. ⁵⁶ Haû myiwe zô é yhângnu eq yhângwa nhik gi, gyai maú byuq akô. Nghut kôhlang, Yesuq gi, haû dut é hkyô ó lé le a taî kyo râ matú, yhangnhik lé taî hkûn tô ri.

9

*Lagyo Raxe Í Yuq Lé Nhang Htoq Kat É Hkyô**Mht 10:5-15; Mrk 6:7-13*

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byî ri. ² Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lháng hkâwûn hkâchùng kó. ⁴ Nungmoq hká yhûm má wàng kôhlang, haû wâ mai dum htoq ló é buinyì jé shoq, haû yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyâm to keq." ga taî kat ri. ⁶ Haû mù, yhangmoq gi, htoq e ló luî, wâ hkang wâ mó má haû gabú danglù hko kyo uchyang, hká jé hkâmá nòhpyo lhoq gê byî wún akô.

*Herut Maú Úng-âng É Hkyô**Mht 14:1-12; Mrk 6:14-29*

⁷ Haû su dut é hkyô banshoq lé, mauzau Herut wó gyô yù luî myit wuî nyi ri. Hkâsu mù gê le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhé é myiqhtoi

rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wá nghut lhê lhu?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuî chûng mù, Bet-saida gâ é wà mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naù bang lé, lhoq gê byî ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haú shiwa byu pé lé, awui ayàm mâ é yhùm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yhangmoq lé rajung jung byi tso keq." ga tú taí ri.

Yhangmoq gi, "Shí myhò bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baú lhang ngo hkyîng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, banshoq bang lé zùng nhang to bekô. ¹⁶ Haú hkûn, Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri. ¹⁷ Haú hkûn, yhangmoq

banshoq bang zô gyî bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhú?" ga myî ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luî, yhangmoq tû taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myî ri.

Haú hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tû taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri. ²² Haú mù, Yhang gi, "Haú Byu Yhangzo gi, zing-rî é myo myo hui zo luî, suwún wuî, hkyangjong agyi pé, tarâ sará pè èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyì má, lhoq toq yu é hui râ nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, nyí wuî yhumsing é tapzîng lé waq chûng* luî, cháng ra râ nghut lhê. ²⁴ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é

* ^{9:23} Tapzîng lé waq chûng nghu é gi, Yesuq é yanmai jamjau huî é lé taí é nghut lhê.

hui râ nghut lhê. ²⁵ Byù gi, mingkan gón lé wó sing to kôlhang, yhumsing é asak woi-nyí sôm byuq é nghut le gi, yhang é matú, haí akyû bò râ lhú? ²⁶ Ngò eq Ngá é dang lé, lhom hap yù râ lé hoq é sù ó yuq lé le, haù Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haù chyoiyúng maumang lagyô pê é hpungwup shingkang èq jé lé é hkûn, hoq pyám râ nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang haù taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chùng mù, bùm shut doq ló ri. ²⁹ Kyû dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Haù hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dang nyo lhûm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhûm nyi akô. ³² Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô. ³³ Haù nhik Yesuq chyáng mai gâng ló nyi é hkûn, Petruq gi, Yesuq lé, "Yhumsîng ê, shí jowò má nga-nhúng nyi le ge ri, haù mù, Nàng é matú ralhûm, Mosheq é matú ralhûm, Eliyaq é matú ralhûm kut, ngamoq lé, zúm sôm lhum saí nhâng laq." ga taí kat kôlhang, yhang haí taí nyi é lé, yhang a sé.

³⁴ Petruq dang taí nyi ashí hkûn lé, mhut jé mù, yhangmoq lé htup zíng lo nyi ri. Mhut haù htup lo nyi é

yanmai, yhangmoq gi, gyuq byuq akô. ³⁵ Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq." gâ ri. ³⁶ Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haû bun haú yoq má, ó lé le a taî kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byî É Hkyô

Mht 17:14-18; Mrk 9:14-27

³⁷ Hau htâng nyí, yhangmoq bùm haû mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri. ⁴⁰ Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹ Haû mù luí, Yesuq gi, "Lumjín myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Nung zo lé, shí shut shuî lé lô aq." ga tû taî ri.

⁴² Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haû agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byî ri. ⁴³ Nyi mi-nyî gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haû lé maú nyi bùm kô le, Yesuq gi, ⁴⁴ "Haû Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé

nungmoq é no má rago gyô wun to keq." ga luí, chángzô pé lé taí ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haú gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sû nghut lhê lhú ga, rayuq eq rayuq taí myíng myô lhúm nyi akô.

⁴⁷ Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuî yù mù, Yhâng nàm má shap to luí, ⁴⁸ "Shî zoshâng lé Ngá é myíng mai hap sû ó yuq nghut kôle, Ngo lé hap yu é sû nghut bê; Ngo lé hap yù sû ó yuq nghut kôle, haú Ngo lé nhang kat é Sû lé hap yu é le nghut lhê. Haú mù luí, nungmoq banshoq má, je tiq sû gi, je ko sû nghut lhê." ga luí, yhangmoq lé taí ri.

⁴⁹ Háu hkún, Yohan gi, "Yhumsîng ê, Náng é myíng lánng luí, nat gâng pé lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sû nghut é yanmai, yhang lé ngamoq hkúm pyám é nghut lhê." ga taí ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sû gi, nungmoq é hkyam shut nyi sû nghut lhê." ga luí, yhang lé taí ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkúng shut shuî toq yû râ buinyî chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyo nhang kat ri. ⁵² Lagyo haú bang gi, Yhâng matú râ é hkyô lajang lánng râ ga, Samariq wà rawà má wang ló akô. ⁵³ Nghut kôlhang, Yesuq gi, Yerusalem wà mó shut laí e ló é sû

nghut é yanmai, haú wâ bang gi, Yhang lé a lhom hap yù kó. ⁵⁴ Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhu?" ga luî, Yesuq lé myî akô. ⁵⁵ Yhang kúm gi, lhing wú luî yhangnhik lé, tân pyâm ri, ⁵⁶ haú mù luî, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luî, Yesuq lé tâi ri.

⁵⁸ Yesuq gi, haú yuq lé, "Wamhkuî pé gi, hkyûng wó akô, nghoq pé le, nghoqsut wó akô. Nghut kôlhang, haú Byu Yhangzo gi, ulhum to jang lhang a wó é nghut ri." ga tâi pyám ri.

⁵⁹ Dum rayuq lé, "Ngá htâng cháng aq." ga tai jáng, haú yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga tâi ri.

⁶⁰ Yesuq gi, yhang lé, "Shî bê bang† gi, shî bê bang yhangchang yhûm lum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga tâi ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga tâi ri.

⁶² Yesuq gi, "Yò hpuq lí zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luî, yhang lé tâi ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

† 9:60 Shî bê bang gâ é gi, woi-nyí má shi to bang lé gâ lhê.

¹ Hau htâng má, Yhumsîng gi, gotû chángzô pé nyhit xê yuq* lé hkyin yù mù, Yhang e ló râ wà eq jowò hkangmó shut í yuq razúm zúm kut luî, Yhâng é hí má ê nhang kat ri. ² Yesuq gi, yhangmoq lé, "Kyô† shù yù râ myo shoq joq kôlhang, mù zui râ byù gi, shaû nyi ri. Haû mù, haû kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq. ³ Nungmoq e ló keq! Wamhkui hpúng má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htung eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

⁵ Nungmoq gi, hká yhûm má wàng e ló kô le, 'Shi yhûm nguingón nyî sháng gaq.' nghû luî, hí taí keq. ⁶ Haû yhûm má nguingón hkyô eq gingdán sù nyi é nghut le gi, nguingón hkyô haû gi, haû yuq é ahtoq má joq to râ nghut lhê. Haû a nghut jáng, nguingón hkyô haû gi, nungmoq chyáng dum taû lo byuq râ nghut lhê. ⁷ Haû yhûm má nyi to mù, yhangmoq haî byî le haî zo haî shuq keq; hkâsü mù gâ le, mù zui sù gi, zuihpau wó yû gíng lhê; haû mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. ⁹ Haû mâ é nò bang lé lhoq gê byi mù, 'Garai Gasâng é mingdán gi, nungmoq eq chyáng lò bê nghut ri.' nghû luî, yhangmoq lé taí kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haû wâ mâ é hkyô mó má htoq ê mù, ¹¹ 'Ngamoq é hkyî má

* 10:1 Chyúmdang ra-am má gi, chángzo nyhit xê í yuq ga le kâ tô ri.

† 10:2 Kyô nghû é gi, Yesuq lé lumjîng nàu kôlhang taí kyo râ bang a nyi luî láng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

dap tô é nungmoq wà mâ é hpuilhaû lháng, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luí taí keq. ¹² Ngò, nungmoq lé taí kôlé, haû buinyi[§] lé, haû wâ gi, Sodom wà htoq má je hpuzo râ nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haû mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê. ¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê." ga taí ri.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taû Jé Lo É Hkyô

¹⁷ Hau htâng, haû chángzo nyhit xê yuq gi, gabú myit èq dum taû lò mù, "Yhumsîng ê, náng é myîng lé lang jáng, nat gâng pé lháng ngamoq é dang lé gyô bum akô." ga taí akô.

¹⁸ Haû su ga taí kôjáng, Yesuq tû taí é gi, "Tsadán gi, mauhkûng htoq mai lhap hpyat é su byit gyó lo é lé ngò

[§] 10:12 Haû buinyi gâ é gi, Garai Gasâng tarâ jéyáng é buinyi lé gâ lhê.

* 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhîng kô é yanmai nghut ri.

myang kat bê. ¹⁹ Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyè pê é wum-o a-tsam banshoq lé wó ûng râ ahko ahkáng lé byi bê nghut mù luì, hai èq le nungmoq lé wó lhoq hten râ a nghut lo. ²⁰ Nghut kôlhang, nat pé nungmoq é dang gyô é lé za hkâgabú nyî kó, mauhkûng htoq mâ é asak jihpán laiká buk má nungmoq é myìng bo to bê lé sheq gabú nyî keq." ga tâi ri.

²¹ Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsíng, Áwa ê, Nàng gi, haú pé lé, hpaqchyî byéng-yá bò bang eq myit hpaqchyî sé bâng é hí mai haq nghop to luì, zoshâng wuì lé tûn shit bê nghut é yanmai, Ngò, Nang lé hkya-ôn lê ô. Nghut bê, Áwa ê, haú gi, Nàng ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luì ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luì, ó a sé." ga tâi ri.

²³ Hau htâng má, Yhâng é chángzô pê shut lhing wú luì, yhangmoq lé baú za haq tái kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé tái kôlé, nungmoq wó myâng, wó gyô é pé lé, myiqhtoì pé eq hkohkam pé myo myo gi, myàng naù gyo naù kôlhang, a wó myâng, a wó gyo kó nghut ri." ga tâi ri.

Gè É Samariq Byù

²⁵ Haú hkûn, wú keq, tarâ sará rayuq gi, toq luì, Yesuq lé, "Sarâ ê, ahtum abyuq é asak lé wó yû shoq, ngò hkâsu kut râ râ lê lhú?" ga luì, Yhang lé myî chyam wú ri.

²⁶ Yesuq gi, "Mosheq é tarâ má hkâsu ga kê tô ri lhu? Nàng haû lé hkâsu nghap yu nyi lê lhu?" ga luî, yhang lé myî ri.

²⁷ Haû yuq gi, "'Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng é wum-o banshoq, náng myit é hkyô banshoq eq, chyitdap râ lê;'[✠] 'náng gûng lé nàng chyitdap é su, náng é chyangnâm mâ é bang lé le chyitdap aq.'[✠]" ga tû taî ri.

²⁸ Yesuq gi, "Nàng tû taî é dang jô ri; haû su yhang kut aq, haû jáng nàng gi, asak duì râ nghut lê." ga yhang lé taî ri.

²⁹ Nghut kôlhang, haû yuq gi, yhâng gungdu dingmán é lé, tûn shit naû luî, "Ngá é chyangnâm mâ é sù gi, ó yuq nghut lê lhu?" ga luî, Yesuq lé myî ri.

³⁰ Yesuq tû taî é gi, "Byù rayuq gi, Yerusalem wà mó mai Yerihko wà shut gyó ló le, damyaq eq htûng huî ri. Damyaq haû bang gi, yhâng é mebu pé lé hkyut shang pyám byi kôluî, rayúm gyut shoq bat nha mù, aluq shoî shî jáng sheq tô pyâm to kôluî ló byuq bekô. ³¹ Haû u lé, hkyangjong rayuq gi, haû hkyô mai lâi âng ló le, haû damyaq hui sù lé myàng jáng, koi lâi ló byuq ri. ³² Haû eq rajung za, Lewiq rayuq le, haû mai lâi ló é hkûn, haû yuq lé myàng jáng, koi lâi ló byuq ri. ³³ Nghut kôlhang, Samariq byù rayuq le, haû mai lâi ló é hkûn, haû yuq leq tô é lé myàng jáng, wú shogyo luî yhâng chyáng huî ê mù, ³⁴ yhâng é dâm má, xû eq tsibiyiq wing shoq gyun luî, rago za htup byi mù, yhâng é logúng má, haû yuq lé bún ke luî, bing-yhûm ralhûm má jé shoq shuî ló mù, gôn lajang byî ri. ³⁵ Htang nyí lé, yhang gi, haû bing-yhûm yhumsîng lé ngùn Denari í chap shê byi mù, taî é gi, 'Shí yuq lé wú

✠ 10:27 Tarâ Pun 6:5 ✠ 10:27 Nhong 19:18

lajang byi laq, yhâng gùng má nàng myo chung záng é banshoq lé ngò dum taù lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nàng gi, byù haú bang sum yuq má damyaq huí sù é chyangnâm mâ é đông nghut sù gi, hká yuq nghut râ su ngam ri l hú?" ga luí, Yesuq myî ri.

³⁷ Haù tarâ sará gi, "Haù yuq lé shogyo sù nghut ri." ga taí ri.

Yesuq gi, "Nàng le haù đông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri.

³⁹ Mahtaq gi, Mariq gâ é yhanggu myiwe zo rayuq wó ri. Mariq haù gi, Yhumsîng Yesuq é hkyî wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, saí tso saí huq é amû myo luí, gyin bûn nyi ri. Haù mù luí, yhang huí ê mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi l hú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haù hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.

⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haù je ge é hkyô lé hkyin yù bê nghut ri. Haù lé yhâng chyáng mai wó yu pyám byi râ a nghut." ga luí, yhang lé tû taí ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi,

"Yhumsîng ê, Yohan gi, yhâng é chángzô pé lé kyûdung râ hkyô mhoq byî é su, ngamoq lé le mhoq byi laq." ga Yhang lé taî ri.

² Haú hkûn, Yhang gi, "Nungmoq kyûdûng le, 'Mauhkûng htoq tsáng myhâng mâ é ngamoq é Âwa ê, Náng é mying gi, chyoiyúng nyî sháng gaq. Náng é mingdán jé lô sháng gaq.

³ Ngamoq nyí wuî râ é zoshuq lé, ngamoq lé nyí wuî byi laq.

⁴ Ngamoq lé shut é byù banshoq bâng é mara lé, ngamoq hkyut pyám byî é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.' nghû keq." ga luî, yhangmoq lé mhoqshit ri.

⁵ Yesuq yhangmoq lé dum taî é gi, "Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggàm yoq má haú yuq chyáng ê luî, 'Buinùm hpó ê, ngo lé muk sùm long byam chyî byî kat laq, ⁶ haî mù gâ le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso râ haî le a joq byam dut tô ri.' ga taî é hkûn, ⁷ yhúmhaû shut mâ é sù gi, 'Ngo lé, hkâlê lhoq hkyik lo, hkum le myhî pyám bê, ngá zoshâng wuî le ngò eq rahá yhupjang má yhup to bekô. Ngò, nang lé haî le a wó toq yû byi lo.' ga tu kat ri. ⁸ Ngò, nungmoq lé taî kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹ Haú mù, ngò, nungmoq lé dum taî kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luqgok byi kó râ lhú? Ngozo dúng le, lhangmuì byi kó râ lhú? ¹² Woq-ú dúng le, gogok byi kó râ lhú? ¹³ Agè ashop é bang nungmoq lhang gi, nungmoq é zo wuí lé, ge é chyunghuq dat byi kô le nhing, mauhkung htoq tsáng myhâng mâ é nungmoq é Îwa gi, Yhang lé dúng é bang lé, je riyhang haù Chyoiyúng Woi-nyí byi râ nghut lhê." ga taì ri.

Mara Hùn É Dang Lé Yesuq Tô Taì É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haù yuq chyáng mai hkat htoq pyâm ri. Nat haù htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chòm maú byuq bum akô. ¹⁵ Nghut kôlhâng, yhangmoq chyáng mâ é ra-am gi, "Yhang gi, nat gâng pê é zau Bezebulaq é wum-o a-tsam èq za, nat gâng pé lé wó hkat pyâm é nghut ri." ga taì bum akô nghut ri. ¹⁶ Ra-am le, Yhang lé, mauhkung mâ é kumlhá tân shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù taì é gi, "Ikun byoq é mingdán hká lhum nghut kôle, hten byuq râ za nghut lhê; haù eq rajung za, ikun byù yhangchang rayuq eq rayuq byoq lhûm é yhûm htu gi, byoq gâng lhum râ za nghut lhê. ¹⁸ Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taì é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. ¹⁹ Ngò gi, Bezebulaq é wum-ô èq za, nat gâng pé lé hkat htoq é

* 11:16 Byu pé gi, Yesuq lé Garai Gasang nhang kat é hkyô lé saksé myàng nàu lú, mauhpo kumlhá dúng nyi akô.

nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é nghut lhê lú? Haû mù luí, yhangmoq gi, nungmoq lé jéyáng é bang dut bekô râ nghut lhê. ²⁰ Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán[†] gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.[‡]

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuî tsiing sù gi, lhoq pyo pyâm é sù nghut nyi ri.

²⁴ Haû agè ashop é nat gi, byù rayuq chyáng mai htoq lò mù, kyuq huí é jowò pé má sô yông e lò luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi laí lo é yhûm má dum taû lò wú râ.' ga taí ri. ²⁵ Yhang dum taû jé lò wú le, yhûm haû gi, shum pyám mù san za rago dut to lánq é lé lò myang ri. ²⁶ Haû jáng, yhang gi, dum taû ê mù, yhâng htoq je wuî é nat nyhit nat lé shuî lò luí, haú má lo wàng nyi to bekô. Haû mù, haú yuq é nyi yap sâmlai gi, hí lhê htoq má je wuî lò bê nghut ri." ga taí ri.

²⁷ Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé taí é gi, "Nang

[†] 11:20 Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkanq é lé gâ é nghut lhê. [‡] 11:22 Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pè chyáng mai, wó hkat pyám bê nghut ri.

lé wun é ûng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luî châng kut é bang gi, je riyhang hkungsô wó kó râ nghut lhê." ga taî ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taî é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dîng nyi bùm kôlhang, Yonaq é kumlhá mai lai luî, gotû haî le tûn shit râ a nghut.

³⁰ Yonaq gi, Ninewe wà byù pê hí má kumlhá[§] dut é su, haû Byu Yhangzo gi, shí pyat lhê é byu pê hí má, kumlhá dut râ nghut lhê. ³¹ Maupyî mâ é hkohkâm myhí gi, maumyî lô htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyî má, shí ipyat mâ é byu pé eq rahá toq lô luî, yhangmoq lé mara hûn râ nghut lhê. Wú keq, Sholumon htoq ko sù gi, ahkuî shí má jé nyi to bê. ³² Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyî má, shí ipyat eq rahá toq lô luî, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuî shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ³⁴ Náng é myoq gi,

[§] 11:30 Kumlhá gi, Yonaq, ngozô wamdau má sum nyí lúng é su, Yesuq le, shí bê mai sum nyí nghû râ nyí má, dum dui toq lô râ hkyô lé taî nau é nghut ri.

náng gungdû é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haû mù, náng chyáng bo é maubó gi, mauchut byuq é, a chut byuq é lé wú nyi aq. Nàng lumjíng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragungdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi râ nghut lhê." ga taí ri.

*Hparishe Pé Eq Tarâ Sará Pé Lé, Yesuq Mara Hun É Hkyô
Mht 23:1-36; Mrk 12:38-40; Luk 20:45-47*

³⁷ Yesuq haû su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haû mù, Yesuq gi, haû yhûm má wang ê mù zang zo râ ga siboi nàm má zung tô ri. ³⁸ Nghut kôlhang, Hparishe wá gi, zang zo râ hí má Yesuq loq a chi é lé, myàng luí maú nyi ri.†

³⁹ Haû mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chi yúng nyi kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte‡ lé le, ahtoq§ lé le, saí sù gi, Garai Gasang rayuq za nghut é lé, a sé kó lhú? ⁴¹ Nghut kôlhang, ahte má bo é zè pé lé, ra châ é bang lé byi pyám keq; haû hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai

* 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htûng tarâ má gi, zang a zo shi má loq chi râ lhê. ‡ 11:40 Ahte gâ é gi, i-myt unghkaû lé taí ri. § 11:40 Ahtoq gâ é gi, gungdu lé taí ri.

Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhaî pyâm tô akô. Xê gambùm ragambùm byî é lé le cháng luî, tarâ dingmán é hkyô eq Garai Gasang lé chyitdap é hkyô lé le, kut nyî râ lhê.

⁴³ Hparishe pé ê, nungmoq gi, dingnyé wó ri, hkâsu mù gê le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gê le, nungmoq gi, ahkô a dong lo mù, byu pé a sé luî, ahtoq mai sô laî é lupdùng eq du akô." ga taî ri.

⁴⁵ Haú hkûn, tarâ sará rayuq gi, "Sarâ ê, nàng haú su gê é gi, ngamoq lé le rhoi lhôm nyi é nghut bê." ga Yhang lé tû taî ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gê le, nungmoq gi, byu pé lé, wùn waq râ wuî é noqkuq htúng tarâ wòlai lé wùn nhâng luî, yhumsîng yhang gi, wò haú lé loqnyhuî eq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gê le, nungmoq gi, nungmoq é îchyí îwâ pé sat pyâm é myiqhtoî pé é lup lé luptsuq tsuq akô. ⁴⁸ Haú mù luî, nungmoq gi, nungmoq é îchyí îwa pé é muzó lé, myit bo huî é bang nghut nyi akô. Hkâsu mù gê le, yhangmoq gi, myiqhtoî pé lé sat pyám mù, nungmoq gi, lup haú pé lé luptsuq tsuq akô. ⁴⁹ Haú mù luî, Garai Gasang, Yhâng é hpaqchyî byéng-yá mai taî é gi, 'Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang mâ é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gê ri. ⁵⁰ Haú su mù luî, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyám huî é Zahkariq é sui

jé shoq, shun pyâm é myiqhtoî pê é sui banshoq bâng é manglat gi, shí pyat mâ é byu pé lé hûn râ nghut lhê.
⁵¹ Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naú bang lé le, hkûm zing tô akô nghut ri." ga taí ri.

⁵³⁻⁵⁴ Yesuq haú mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luî, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyíng mun zup zîng lò mù, rayuq eq rayuq lháng záng nâng lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pê é múnchi lé koi sidiq pyám keq. ² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³ Haú mù luî, nungmoq, mauchut hkaú má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô râ nghut lhê.

⁴ Ngá buinùm wuî ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó. ⁵ Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraî ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyi keq.

⁶ Johkyáng ngo du lé, gyi htingchap í chap èq wó ùng pyâm lhê a nghut kó lúhú? Haù johkyáng radu lé lhang, Garai Gasang gi, tô-myhí pyâm é a nghut. ⁷ Garai Gasang gi, nungmoq é ulhum mâ é xâm banshoq lé lhang, nghap to gù nghut lhê. Haù mù, hkâgyuq kó; nungmoq gi, haù johkyáng myo myô htoq má lhang gù je bo é bang nghut lhê.

⁸ Ngò, nungmoq lé tái kôlé, byu pè hí má Ngo lé lhom yín yu é sù ó yuq nghut kôle, Garai Gasâng é maumang lagyô pè é hí má, haù Byu Yhangzo gi, haù yuq lé lhom yín yû râ nghut lhê. ⁹ Nghut kôlhang, byu pè é hí má Ngo lé he-ngik pyâm é sù lé chyaú gi, Garai Gasâng é maumang lagyô pè é hí má, he-ngik pyám râ nghut lhê. ¹⁰ Haù Byu Yhangzo lé dang dông shut é sù gi, mara hkyut byî é wó hui ra nghut lhê; nghut kôlhang, haù Chyoiyúng Woi-nyí lé rhoi dang tái pyâm é sù gi, mara hkyut byî é hui râ a nghut.

¹¹ Byu pé nungmoq lé jéyáng râ matú tarajong pé má le, agyì suwún wuì eq ahkáng ayá wó bâng é hí má le, shuì e ló kô é hkûn, hkâsu kut râ lé le, hkâsu nghû tû tái râ lé le, hkâ-mytit chiq kó. ¹² Hkâsu mù gâ le, haù u lé yhang, Chyoiyúng Woi-nyí gi, nungmoq hkâsu tái râ hkyô lé mhoqshit byi râ nghut lhê." ga tái ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haù hkûn, shiwa hpúng hkaû mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo tái byi laq." ga luí, Yesuq lé tái ri.

¹⁴ Yesuq gi, "Byù nàng ê, nungnhik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é lúhú?" ga luí, yhang lé tû tái ri. ¹⁵ Yesuq yhangmoq lé tái é gi, "Myoqnoq é hkyô banshoq mai, nungmoq é i-mytit lé

hkâm zìng luî, koi sidiq nyì keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhùm dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haû mù luî, yhâng é unghkaû má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸ Dum nghut jáng, yhang gi, 'Ngò îsu kut wú râ abe, ngá é chyî xau pé lé hpyoq pyám luî, je kô é chyî pé lé saí râ nghut lhê. Chyî haú pé má ngá é guqzo muilhum pé eq sutzè banshoq lé, tsîng kat to luî, ¹⁹ ngá é i-myt lé îsu nghû taí râ, "I-myt ê, zanwut myáng myáng é matú, zè gè myo myo ngò tsîng to bê. I-myt nàng zim za kut nyì aq hkoi. Zo mù, shuq mù, ngón ngón nyì aq." ga' gâ ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut râ lhú?' ga luî, yhang lé taí ri.

²¹ Haû eq rajung za, yhumsing é matú sutzè hkong to mù luî, Garai Gasâng é hí má myung nyì sù gi, haú yuq su nghut râ nghut lhê." gâ ri.

Myit A Chiq É Za Garai Lé Lumjìng Râ Hkyô

Mht 6:25-34, 19-21

²² Yesuq, Yhâng é chángzô pé lé dum taí é gi, "Haû mù luî, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó. ²³ Asak gi, zoshuq htoq má, gungdu gi, mebû htoq má, je ahkyak lhê. ²⁴ Nghonoq pé é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpauđap nyi lhê a

nghut kó lúhú? ²⁵ Nungmoq má, ó yuq wá, myit chiq é èq, yhumsing é asak lé radúng kô wó jat yù kó rà lúhú? ²⁶ Haú su mù luí, tiq dik é hkyô lé lhang, nungmoq a wó kut kô é nhîng, haí mù luí gotû hkyô pé lé, myit myô nyi akô lúhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mô le a zui, hkyîng le a duì kó nghut ri. Nghut kôlhang, Ngò, nungmoq lé taí kyo kôlé, Hkôhkâm Sholumon hpúng kô dik u lé wut é mebu lhang, ban haú rabó lé a hkyit nghut ri. ²⁸ Lumjîng myit tiq é bang ê, hkû-nyí joq mù, napmá myihkyóm má dú kat pyám hui rà nghut é yosô mhan pé lé za lhang, Garai Gasang haú su kut hut é nghut le gi, nungmoq lé, je riyhang hut rà a nghut kó lúhú? ²⁹ Nungmoq gi, haí zo haí shuq rà lé hkâho nyi kó; haú eq séng luí lé hkâ-myit chiq nyí kó. ³⁰ Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq rà é hkyô, sé byí nyi lhê. ³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi rà nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byí nau nyi ri. ³³ Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtûng saí luí, hkau sù lé a jé, manot èq le a wó zô é sutzè lé mauhkûng htoq má hkong to keq. ³⁴ Hkâsu mù gâ le, náng é sutzè joq jang má, náng é i-myit le jé nyí rà nghut lhê.

Yesuq Dum Jé Lé Lô Râ Hkyíng Lé Machya Nyí Râ Hkyô

Mht 24:45-51

³⁵ Nungmoq gi, hpyihit hit luí, (mô zui rà matú rì rì kut to keq); nungmoq é myibung lé tuq to mù, ³⁶ myiháng

* 12:27 Htutbó ban gi, yúng dik é yosô ban nghut lhê.

poî mai dum taû lò luî, hkúm lo kok é, yhumsîng hpó lé radá dâm hkum lhom wó hpông hâng yù shoq, láng tô é dui-nhâng zoshâng wuì su kut nyî keq. ³⁷ Haû yhumsîng jé lo le, machya nyì láng é dui-nhâng zoshâng wuì gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haû yhumsîng hpó gi, yhangmoq lé yuq zung to nhâng luî, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggàm yoq lé nghut kôlhâng, woq tân hkûn lé nghut kôlhâng, haû su kut machya nyi é lé, yhumsîng hpó lo myang é nghut le gi, dui-nhâng zoshâng haû bang hkungsô wó nyi ri. ³⁹ Yhumsîng hpó rayuq, hká u má hkau sù lé lô râ lé, sê tô é ru nghut le gi, yhang machya nyì luî, yhâng yhûm lé a wó hput htong nhâng râ nghut é lé, bûn sê nyi keq. ⁴⁰ Haû mù, nungmoq le rì rì nghut nyî keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haû hkûn, Petruq gi, "Yhumsîng ê, dangtú shî gi, ngamoq lé za, taí é nghut lhê lhuí? Haû a nghut jáng, lhunglhâng bang lé taí é dông nghut lhê lhuí?" ga myî ri.

⁴² Haû jáng, Yesuq gi, "Lumgíng é eq hpaqchyî bo é sùt zum sù gi, hká yuq nghut lhê lhuí? Haû yuq gi, yhâng yhumsîng é dui-nhâng zoshâng wuì lé ahkyíng jé jáng zoshuq gàm byi râ matú, yhumsîng hpô èq hkyin to sù dut râ nghut lhê. ⁴³ Yhumsîng hpó dum taû lo é hkûn, haû su kut nyî láng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsîng hpó haû gi, yhâng é sutzè banshoq, dui-nhâng zoshâng haû lé ap to râ nghut lhê. ⁴⁵ Nghut kôlhâng, dui-nhâng zoshâng haû gi, yhâng é i-myit unghkaû má, 'Ngá é yhumsîng hpó jé lô râ gyai myáng ashî.' ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê î shuq wut nyi é nghut jáng, ⁴⁶ dui-nhâng zoshâng

hau é yhumsîng hpó gi, yhang a myitbyu tô é buinyè eq yhang a sé tô é ahkyíng má jé lô mù, yhang lé jap pyám luí a lumjîng bang eq rahá nyhi pyám rá nghut lhê.

⁴⁷ Yhumsîng hpô é i-myt lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing èq nhuq bat é lé, myo myo hui zo rá nghut lhê. ⁴⁸ Nghut kôlhang, a sé mù kut shut sù kúm gi, shau za bat é hui rá nghut lhê. Haû eq rajung za, Garai Gasang gi, myo shoq wó yû su chyáng mai, myo shoq dúng yù rá nghut lhê. Myo myo ap byî tô é hui su chyáng mai, je myo shoq dum dúng yù rá nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng rá matú nghut lhê. Myi haû dap to lánng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yù rá é baptisma† rajung joq ashî, haû a hkam yù yù gi, ngò gyai yhang hkâm zo wuí nyi ri. ⁵¹ Ngò jé lé é gi, myidàm htoq má simsaq hkyô byi rá matú nghut nhô ngam akô lú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang rá matú sheq ru nghut lhê. ⁵² Haû su mù, ahkuí mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô rá nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô rá nghut lhê." ga taí ri.

† 12:50 Shî mâ é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

Dut Lò Râ Hkyo É Kumlhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haú eq rajung za le, dut lò lò mu ri. ⁵⁵ Dum nghut jáng, maupyî shut mâ é lài lo le, 'Bùi htân berâ.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumlhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsîng yhang yhang a wó doqdân yù kô é lhú?

⁵⁸ Dangké, nang lé yui tsuq sù eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsîng gi, nang lé tarâ agyì chyáng ê dé pyám luí, tarâ agyì gi, htóng hkyó su chyáng, nang lé ap pyám luí, yhang gi, nang lé htóng má lhûng pyám râ nghut lhê. ⁵⁹ Ngò, nang lé taí lé, yuichyîn haú a ban xap xap gi, htóng haú mai nàng wó htoq ló râ a nghut." ga taí ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kô râ nghut lhê. ⁴ Haú htoq

agó, Siloam wà mà é machya gyop gyó luí, nhê sat huí é byù raxe shit yuq gi, Yerusalem wà mó mà é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haû su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haû eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhang é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri.

⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haû lé htuq pyám aq. Haí mù, maumyí aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lêngghkyuq má ngò du lêng to mù, myìhpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsîng lé tô taí ri." gâ ri.

Bánno Buinyì Má Gùng Loq Hten Sù Lé, Lhoq Gê Byî É Hkyô

¹⁰ Bánno buinyì lé, Yesuq gi, tarajong rallhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dângngóm luí, gungdu ratsuí lhang a wó lhoq nyhâng lô é sù nghut ri. ¹² Yesuq gi, myiwe haû lé myàng jáng, yhang chyáng wut yù mù, "Myiwe myhí ê, nàng, nòhpyo mai gè berâ." ga luí, ¹³ yhang é ahtoq má loq ke byî ri. Haú hkûn jáng, myiwe haû gi, nyàng za dum wó yap luí, Garai Gasang lé hkya-ôn nyi ri.

¹⁴ Haû mù, Bánno buinyì lé, Yesuq nòhpyo lhoq gê byî é yanmai, tarajong má up sù gi, wú nhik-yo luí, "Mù wó zui é buinyì hkyuq nyí joq tô le, buinyì haú pé má, lé wó lhoq

ge yù lhê. Haû mù, Bánno buinyì má gi, hkâkut kó." ga luî, shiwa byu pé lé taí kat ri.

¹⁵ Haû hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyì lé, yhumsing é no, logúng pé lé, hkup mai hpông htoq yû mù uchyam byi huq huq kut akô a nghut lhú?" ¹⁶ Haû nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shî lé, Bánno buinyì má Tsadán loq mai, hkyut byi a gíng râ lhú?" ga tû taí ri.

¹⁷ Haû su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haû hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú?" ¹⁹ Haû gi, byù rayuq mai, yhâng é hkyâm má hô tô é angshi cham eq wuí ri. Angshi cham haû gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú?" ²¹ Haû gi, myiwe zo rayuq èq sungso mún sum bûng má yu nyhó luî, hau pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

²² Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhòqshit byî ri. ²³ Haû hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luî, Yesuq lé myî ri.

²⁴ Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gà le, ngò, nungmoq lé tái kôlé, byù myo myo gi, wó wâng shoq ga shikut wú kó râ. Nghut kôlhang, a wó wâng kó râ nghut lhê. ²⁵ Yhumsîng hpó,* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luî, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tû tái râ nghut lhê.

²⁶ Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byî wú bê nghut lhê.' ga tái bekô râ.

²⁷ Nghut kôlhang, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tû tái kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoî pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luî, haú jowò má ngaubyi ngàu nhap eq zuì kyik kyik shoq hpuzô nyi bùm bekô râ nghut lhê. ²⁹ Hau hkûn, buihtoq, buiwàng, maupyî, mautsûng mâ é mingdán myo myo mai byu pé lé luî, Garai Gasâng é mingdán zoshuq poî má myang zùng kó râ nghut lhê. ³⁰ Haú hkûn, ahkuî htâng gyó nyî bang gi, hí bekô râ; ahkuî hî to bang gi, htâng gyó bekô râ." ga luî, yhangmoq lé tái ri.

Yerusalem Wà Mó Eq Séng Luî, Yesuq Tái É Hkyô

* ^{13:25} Yhumsîng hpó gi, Garai nghut lhê. Yhûm gi, Garaí é mingdán lé tái é nghut lhê.

³¹ Haú u lé, Hparishe pé ra-am gi, Yesuq chyáng lé luí, "Shí jowò maí htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

³² Haú jáng, Yesuq gi, "Hkû-nyí, napmá,† ngò nat gang hkat pyám luí, nò zo hpyo zo lhoq gê byi râ nghut lhê; sum nyí nghû râ buinyì‡ má sheq, ngá mù bàn râ nghut lhê.' nghû luí, agè ashop é wamhkui haú lé ló taí kyo keq. ³³ Haí wá dut kôlháng, hkû-nyí, napmá, sânghe nyí, ngò gi, e ló râ dut ashî. Hkâsu mù gâ le, myiqhtoí pé gi, Yerusalem wà mó mai lai luí gotú jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsîng lhùng yu é su, nungzô pé lé, Ngò hkâ-myhó dâm shuí tsîng yù nàu kôlháng, nàng a dóng nghut ri. ³⁵ Wú keq, nungmoq é yhûm gi, nungmoq é matú chamchuyiuyèi dut pyâm to berâ nghut lhê; Ngò, nungmoq lé taí kôlé; 'Yhumsîng é myìng mai jé lé lo é Sû gi, hkungsô wó nyi sháng gaq.'☆ nghû, nungmoq a taí taí gi, Ngo lé wó myàng kó râ a nghut lo." ga luí, yhangmoq lé taí ri.

14

Hparishe Rayuq É Yhûm Má Yesuq Jé Nyi É Hkyô

¹ Bánno buinyì ra-nyí má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú mâ é bang gi, Yhang lé gyui gyui chôm wú nyi bum akô.

² Haú u lé, wuì wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyì má nòhpyo lé

† 13:32 Hkû-nyí, napmá gâ é gi, Yesuq mingkan htoq má mù zui râ ahkýing lé taí é nghut lhê. ‡ 13:32 Sum nyí nghû râ buinyì gâ é gi, Yesuq mingkan htoq má mù ban zuí é buinyì lé taí é nghut lhê. ☆ 13:35 Hkya-on 118:26

lhoq gê byî é gi, tarâ wang lhê lhu, a wang é lhu?" ga luî, tarâ sará pé eq Hparishe pé lé myî kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nõhpyo hui sù lé, zuî to mù, lhoq gê byi luî, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsing é yhangzo rayuq yuq, haû a nghut jáng, no myang radu du, Bánno buinyì má, wuìhtung má byit gyó le, haú hkûn jáng, a xe htoq yu é za, wó nyî kó râ nghut lhê lhu?" ga myî kat ri. ⁶ Yhangmoq kúm gi, dang haú hkun lé, haî le a wó tû taí kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyì kô é lé myàng jáng, yhangmoq lé dangtú dông taí é gi, ⁸ "Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luî, náng lé lé taí jáng, nàng hoq hpu luî, hkyî htâng shut huî zùng ra râ nghut lhê. ¹⁰ Haû mù luî, supé nang lé ji le, hkyî htâng má ê zùng aq; haú hkûn, nang lé jì sù lé mù luî, 'Buinùm hpó ê, shí je réng é jowò má huî doq zùng aq.' ga luî, nang lé taí jáng, nàng eq rahá zung tô é bíng lhunglhang bâng é hí má, nàng gi, myoqdong wó râ nghut lhê. ¹¹ Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga taí ri.

¹² Hau htâng, Yesuq yhang lé ji é yhumsing hpó lé taí é gi, "Napzang, a nghut jáng, myinxûn lé nàng byi tso nau le gi, náng é buinùm wuì, âgu âmâng pé, mungmoq wuì, sùt wó é yhumkyo chang pé lé hkâjî tso. Haú bang lé jì tsô é nghut jáng gi, yhangmoq nang lé dum jì tsô é èq, jeju dum tau kó râ nghut lhê. ¹³ Nghut kôlhang, nàng poí kut mù, byi tso byi huq nau é nghut le gi, myùng bang, hkyî gyui

loq hten bang eq myoqjit é bang lé, jì tso aq. ¹⁴ Haû su kut jáng, nàng hkungsô wó nyî râ nghut lê. Yhangmoq nang lé jeju a wó tau kôhang, dingmán bang dum dui toq lo é buinyì má, hau é akyû lé, nàng wó hkam yû râ nghut lê." gâ ri.

Zoshuq Poî Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang haû wó gyo jáng, "Garai Gasâng é mingdán mâ é zoshuq poî má wó zo râ sù gi, hkungsô wó nyî sù nghut râ." ga luî, Yesuq lé taî ri.

¹⁶ Yesuq haû yuq lé tâ taî é gi, "Byù rayuq gi, myinzang byi tso râ ga, zoshuq poî mó ralhüm hen to mù, byù myo myo lé jì tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, jì tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸ Nghut kôhang, haû bang banshoq gi, zoshuq poî má a ê râ dông chyat he pyâm akô. Rayuq sù gi, 'Ngò yohtung rahkyang wui tô lê; haû lé ê wú râ dut ri. Haû mù, ngo lé ahkáng byi shi laq.' ga yhang lé taî ri.

¹⁹ Dum rayuq le, 'Ngò, nohtó ngo zúm wui tô lê; haû pé lé duì nhang chyam wú râ dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹ Haû jáng, dui-nhâng zoshâng taû lò mù, yhâng é yhumsîng lé haû hkyô banshoq lò taî kyô ri. Haû hkûn, yhumsîng hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân ê mù luî, myùng bang, hkyô gyui loq hten bang eq myoqjit bang lé, ê jì lò aq.' ga luî, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsîng ê, nàng nhang é eq rajung za ban kut bê; nghut kôlhang, zùng râ jowò gi, mân tô ashî.' ga tâi ri.

²³ Haû su ga jáng, yhumsîng hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.
²⁴ Nang lé ngò táí lé, hí lé ji to huí é bang rayuq lhang, ngá é zoshuq pôi lé wó chyim wú râ a nghut.' ga luî, yhâng é dui-nhâng zoshâng lé tâi ri." gâ ri.

Yesuq É Chángzo Wó Dut Râ Matú

Mht 10:37-38; 5:13; Mrk 9:50

²⁵ Byù hpûng mó Yesuq eq rahá e ló kô é hkûn, Yesuq gi, haû bang lé lhing wú luî, ²⁶ "Ngá chyáng lé sù ó yuq nghut kôle, yhumsîng é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haû htoq agó, yhumsîng é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsîng é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhûm ralhum saí nau le, yhang gi, yhûm haû ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luî, hí a sôn wú é byù nyi kó râ l hú?

²⁹ Laqmá mù, apûn awang gi, saí hi to mù luî, a wó lhoq pân é nghut jáng, ³⁰ myàng é bang banshoq èq, 'Shí yuq gi, apûn awang gi, saí hi to mù luî, banshoq a wó saí pân lo nghut ri.' ga luî, yhang lé jóng pyám bekô râ nghut l hê.

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luî, hí a myit wú é nyi râ l hú? ³² A ûng râ dut le gi, gyè pé we we má nyi tô ashî hkûn lé, lagyo suwún pé lé nhang kat luî, simsaq râ

matú htingrá m pyám ra râ nghut lhê. ³³ Haû eq rajung za, nungmoq chyáng mâ é ó yuq nghut kôlhang, yhumsing wó é zè banshoq lé, a pyâm to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai èq dum wó lhoq ngam yù râ lú? ³⁵ Haû gi, myigung matú le, myìhpún kut râ matú le, akyû a bò lo. Haû mù luî, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taî ri.

15

Byuq Byuq É Sau

Mht 18:12-14

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zing bum akô. ² Haû hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taî put nyi bum akô.

³ Haû mù, Yesuq yhangmoq lé dangtú dông taî é gi, ⁴ "Nungmoq má, sau rashô du wó luî radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haû lé, myàng shoq a châng ho yu é, ó yuq wá nyi kó râ lú? ⁵ Byuq byuq é sau haû lé myang hô jáng, gyaí gau é i-myt èq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taî râ nghut lhê. ⁷ Haû eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú ralhúm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú râ a nghut l hú? ⁹ Haû lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga taí râ nghut lhê. ¹⁰ Haû eq rajung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haû nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byî kat ri. ¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê. ¹⁴ Haû su kut ngunzè wó mi-wó lé ban langsâ pyâm é htâng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haû mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Haú hkùn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

¹⁷ Haû mù, yhang myit bûn lo é gi, 'Ngá wâ chyáng nyi é langchyáng pé gi, agùn agó myàng zô nyi kó râ nghut lhê. Nghut kôlháng, ngò gi, shí jowò má, zo mut wuìshit é eq shi ló râ dut bê. ¹⁸ Ahkuí, ngò toq mù, ngá wâ chyáng taú ló luí, "Áwa ê, ngò gi, Garai Gasang lé le, nang lé le,

shut bê. ¹⁹ Ahkuî mai ngò gi, nung zo nghû râ a gíng lo, hau é yanmai, náng é langchyang rayuq dông za ngo lé nyì nhâng laq." nghû luî, ló tái râ.' gâ ri. ²⁰ Hau htâng, yhang toq luî, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luî, din ê mù, yhangzô é lingzing má ê po pyik dap to luî, bopuq puq byî ri.

²¹ Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuî mai, ngò gi, nung zo nghû râ a gíng lo.' ga luî, yhâng wa lé dúng tôngbán ri.

²² Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyî má le hkyî-tsung tsung byi keq. ²³ Tsô myum tô é nojúng zo le yu sat keq. Haú mù, nga-nhúng gi, zoshuq poí kut mù chôm ngón sháng. ²⁴ Haî mù gâ le, ngá zo shí yuq gi, shi byuq é mai, ahkuî dum duì bê; byuq byuq é mai le, ahkuî dum myàng bê.' ga tái ri. Haú mù, yhangmoq gi, ngón ngón zo shuq ló bekô.

²⁵ Haú u lé, yhangzo ko sù yuq kúm gi, yò má nyi tô ri. Yhang gi, yò mai yhâm shut jé lo nyi é hkûn, zìng út bat luî gó nyi é htê lé lò wó gyô ri. ²⁶ Haú mù, langchyang rayuq lé wut yù luî, haú hkyô lé yhang myî wú le, ²⁷ langchyang haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luî, tsô myum tô é nojúng zo lé sat bê nghut ri.' ga tái kyô ri.

²⁸ Dang haú lé wó gyo jáng, yhang gi, gyô nhik-yo luî, yhúmhkaú shut a wàng lo kut ri. Haú mù, yhâng wa htoq ê luî, yhang lé ê chyúq ri. ²⁹ Yhangzo kúm gi, 'Wú aq, ngò, shî-myháng shîlo náng é jùn dông kut luî, hkâ-nhám le náng dang lé a lu lai wú. Nghut kôlhang, ngò ngá é luzúm wú eq ngón kún râ matú, bainám zo radu lhang radàm le

nàng a byi wú shi. ³⁰ Shiwa myhî pé eq zum yap wún luî, náng é sutzè lé lhoq pân pyâm é sù nung zo haû dum taû jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luî, yhâng wa lé tâ taî ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. ³² Nghut kôlhang, shî nung gu gi, shi byuq é mai ahkuî dum duì bê; byuq byuq é mai le, dum myàng bê. Haû mù, gabú hpo nghut bê.' ga luî, yhang lé tâ ri." gâ ri.

16

Hpaqchyî Ge Dâ É Sùt Zum Sû

¹ Yesuq, Yhâng é chángzô pé lé tâi é gi, "Sahtê rayuq chyáng sùt zum sù rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haû gi, hkâsu l hú? Nàng sùt zûm é eq séng luî kut tô é jihpán laiká lé lò shit wú aq. Hkâsu mù gâ le, ahkuî mai nàng gi, sùt zum sù wó kut lo râ a nghut lo.' ga tâi ri.

³ Haû jáng, sùt zum sù gi, 'Ahkuî, ngò hkâsu kut lo râ l hú? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zûm é ayá mai hkyô pyâm htâng má, supé ngo lé yhangmoq é yhûm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyîn dap tô é bang rayuq htâng rayuq lé wut yù mù, sâng-hí yuq lé, 'Ngá yhumsing hpô chyáng nàng chyîn hkâ-myhó dap tô lhê l hú?' ga myi jáng, ⁶ haú yuq gi, 'Xû rashô pûng dap lhê.' ga tâi ri.

Haû jáng, sùt zum sù gi, 'Náng é jihpán yù luí, hân zùng mù, ngo xê pûng kut kê to aq.' ga yhang lé taí ri.

⁷Dum rayuq lé, 'Nàng hkâ-myhó dap tô lhê lú?' ga myi jáng, haú yuq gi, 'Sungsô rashô búng dap lhê.' ga tû taí ri. Sutzum sù gi, haú yuq lé, 'Náng é jihpán má shit xê búng kut kê to aq.' ga taí ri.

⁸Haû a dingmán é sùt zum sù lé, yhumsîng hpó gi, hpaqchyî ge da sù nghut ri ga hkya-ôn ri. Ngò shí lé taí é gi, mingkan zo wuî gi, yhangmoq é mingkan eq sêng é hkyô pé má, maubó gung é yhangzo pê* htoq hpaqchyî je bò kê é yanmai nghut lhê. ⁹Haû mù luí, Ngò nungmoq lé taí kyo kêle, a tara é sutzè pê èq buinùm ho nyi keq, haû mù, sutzè haû htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhê.

¹⁰Tiq é mù má wó lum é sù ó yuq nghut kôlhang, mù mó má le wó lûm râ nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui râ a nghut.

¹¹Haû mù, mingkan sutzè má lhang nungmoq lé a wó lûm kê é nghut le gi, haû tengmán é sutzè lé, nungmoq chyáng ó yuq wá kâm ap byi râ lú? ¹²Supé é sutzè má, nungmoq lé a wó lûm kê é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ lú?

¹³Dui-nhâng zoshâng ó yuq nghut kôlhang, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, gunzè lé le, radá dâm wó dojaú kó râ a nghut." ga taí ri.

¹⁴Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byî akô. ¹⁵Haû mù luí, Yesuq gi, yhangmoq lé, "Nungmoq gi, byu pê hí

* 16:8 Maubó gung é yhangzô pé nghu é gi, Garai Gasâng é yhangzô pé lé taí é nghut lhê.

má yhumsing gùng lé yhumsîng dingmán bang su kut shit mhaú é bang nghut akô; nghut kôllhang, Garai Gasang gi, nungmoq é i-myit unghkaú lé sé sù nghut lhê. Byù é hí má hpaudap é pé gi, Garai Gasâng é hí má achag achyut é nghut nyi ri.

¹⁶ Jep é tarâ† eq myiqhtoî pê é dang, ahko ahkáng wó tô é ahkýing gi, wui-myhup sará Yohan jé lé é buinyì jé shoq nghut bê. Haú hkýing mai gi, Garai Gasâng é mingdán hkyô gabú danglù lé, hko kyô nyi mù, yuq du jup gi, haú hkyô má htung chying wang ló bum akô. ¹⁷ Jep é tarâ mâ é tiq dik é dangjí eq myihkyet zo ralhumb lé wó lhoq hten râ htoq, mauhkung eq myigùng hten râ gi, je lui râ nghut lhê.

¹⁸ Dangké, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taî ri.

Sahtê Hpó Eq Lazaruq

¹⁹ Yesuq dum xoq taî é gi, "Radàm lé, sahtê rayuq gi, nè é eq nú-nhâm é mebu wut mù luî, nyi nyi bui bui zo ngón shuq ngón nyi ri. ²⁰ Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. ²¹ Haú yuq gi, sahtê wá é siboî mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byi nyi akô.

²² Htâng má, haú dung zo sù shi byuq jáng, maumang lagyô pé gi, mauhkung má nyi é Abraham é tanghkoî má yhang lé shuî ló byi akô. Sahtê wá le shi byuq luî, yhûm pyám bekô nghut ri. ²³ Sahtê wá gi, ngaraî ming má dik shoq hpuzô nyi mù luî, tu wú kat le, we we má Abraham

† 16:16 Jep é tarâ gâ é gi, Garai Gasang, Mosheq mai nga-nhúng lé byi tô é tarâ lé gâ lhê.

lé le, yhâng é tanghkoí mâ é Lazaruq lé le, myàng kat ri.
²⁴ Haû mù, yhang gi, 'Âwa Abraham ê, ngo lé shogyo yù laq ô. Ngò gi, shî myi htum má achýí aku nyé é hui zô nyi ri. Haû mù, Lazaruq gi, yhâng é loqnyhui û èq wuì má tik yû mù, ngá é shô má wuì ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luî, dúng wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuî, yhang kúm gi, shî má lo nyi byán to bê; nàng chyaú gi, jamjau hui zô nyi bê. ²⁶ Haû mai gotû gi, shî mai nungmoq chyáng dap lé naû bang a wó dap shoq le, haû mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tû tâ ri.

²⁷ Sahtê wá gi, 'Âwa ê, haû nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le îsu hpuzô é jowò má a jé sháng gaq, ²⁸ yhangmoq myit lhîng shoq ló tâi pun râ matú, Lazaruq lé ngá wâ yhûm shut nhang kat byi laq ô!' ga luî, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqh-toî pé nyi lhê; haû bâng dang lé gyô yù kó sháng gaq.' ga tâi ri.

³⁰ Sahtê wá gi, 'Âwa Abraham ê, haû su a nghut. Shi byuq é bang mâ é rayuq yuq yhangmoq chyáng dum taû lo é nghut le kúm gi, yhangmoq myit lhîng kó râ nghut lhê.' ga tâi ri.

³¹ Abraham gi, 'Mosheq eq myiqhtoî pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló tâi kyo kôhang, kâm gyo kó râ a nghut.' ga luî, yhang lé tû tâi ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhâng, mara kut shut nhang é hkyô lé lhoq htoq é sù gi, dingnyé wó râ. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyô pyâm é huí é nghut le gi, yhang é matú je gè râ nghut lhê. ³ Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dàm shut mù, 'Ngò myit lhîng bê.' ga luí, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

⁶ Haú jáng, Yhumsîng gi, "Nungmoq é lumjîng myit angshi cham í za hkâl háng bò kô é nghut le gi, shí hangwâ gàm lé, 'Sikgâm ê, amyit eq roq bún luí, wuishuq lung-aú má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zùng mù zang zo aq.' ga luí, ó yuq wá taí kó râ lhú? ⁸ Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyî aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lhú?

⁹ Taí mitaí banshoq lé, dui-nhâng zoshâng ban zui saí býi

é nghut kôlhang, yhang lé jeju bûn é dang ó yuq wá tâi wú akô lhú? ¹⁰ Haû eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mô lé za lhoq pân é bang nghut lhê.' nghû taí keq." ga tâi ri.

Manggâm Dap Bang Raxê Yuq Lé, Yesuq Lhoq Gê Byî Ê Hkyô

¹¹ Ahkuî, Yesuq gi, Yerusalem wà mó shut e ló nyi le, Samariq mau eq Galile mau gyoro mai laî e ló ri. ¹² Yhang, wà rawà shut wang ló é hkûn, manggâm dap é byù raxê yuq eq huî ri. Haû bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luí, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pê chyáng ló tân shit keq." ga yhangmoq lé tâi ri. Yhangmoq gi, hkyô má ru sô nyi ashî le lháng, sân-yúng ló byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taû ê mù, htê mó èq Garai Gasang lé hkya-ôn é eq, ¹⁶ Yesuq é hkyî wang má pâi gop to luí, Yhang lé jeju hkya-ôn nyi ri. Haû yuq gi, Samariq byù nghut ri.

¹⁷ Haû mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô? ¹⁸ Shî tungbaù rayuq mai lai luí, dum taû lé mù Garai Gasang lé hkya-ôn é byù, rayuq le a nyi lo kó lhú?" ga tâi ri. ¹⁹ Hau htâng, Yesuq gi, haû yuq lé, "Toq mù ló aq, náng é lumjîng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haû jáng, Yesuq gi, "Garai Gasâng é mingdán jé lé râ gi, myoq èq wú luí

myàng râ a nghut. ²¹ Garai Gasâng é mingdán gi, nungmoq yuq jup é ahkaû má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tû taí ri.

²² Chángzô pé lé le Yesuq taí é gi, "Haû Byu Yhangzô é buinyì ra-nyí lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myâng kó râ a nghut. ²³ Haû buinyì má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkâcháng kó. ²⁴ Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haû Byu Yhangzo dum jé lé é buinyì má le dut râ nghut lhê. ²⁵ Nghut kôlhang, haû su a dut htoq shimá, Yhang gi, zing-rî é myo myo lé le, ipyat shi mâ é byu pê èq he-ngik pyâm é lé le, hui shirâ nghut lhê.

²⁶ Noaq é tsîn pyat má dut é su, haû Byu Yhangzo jé lé é buinyì má le dut râ nghut lhê. ²⁷ Byu pé gi, Noaq, wuì-sanghpo mó hkaû má wang é hkûn jé shoq, zo zo shuq shuq, myi byi myi yû, myiháng kut luí, nyi nyi bum akô. Haû hkûn, dowú dítg lô mù, yhangmoq banshoq lé lo lhoq htên pyám bê nghut ri.

²⁸ Haû eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhûm kut luí nyi nyi akô. ²⁹ Nghut kôlhang, Sodom wà mai Lot htoq ló é buinyì má, mauhkûng mai, myi eq hang gi, mau su wò gyó lô luí, lhunglhang lé lhoq htên pyám bê nghut ri.

³⁰ Haû Byu Yhangzo, lé htoq shit é buinyì má le, haû eq rajung za dut râ nghut lhê. ³¹ Haû buinyì má, yhumhkûng* htoq má nyi tô é sù gi, yhúmkaû mâ é zè lé, a ló gyó wang yù lo sháng gaq. Yò má nyi tô é sù

* 17:31 Yudaq byu pê é yhumhkûng gi, rá é nghut lhê mù, nyi kún jang kut akô.

gi, haû eq rajung za, yhûm shut a taû ló lo sháng gaq. ³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. ³⁴ Ngò, nungmoq lé taí kyo kôlé, haú myîn lé, yhupjang ralhum má byù í yuq nyi to kô le, rayuq gi, shuî yu é hui mù, rayuq gi, myit gyó to râ nghut lhê. ³⁵ Myiwe í yuq luí má rahá za chôm luí nyi tô le; rayuq gi, shuî yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyi to le, rayuq gi, shuî yu é hui luî, rayuq gi, myit gyó pyâm to berâ nghut lhê." gâ ri.

³⁷ Haú hkûn, chángzô pé gi, "Yhumsîng Yesuq ê, haû gi, hká gyo má dut râ l hú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tû taí ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuú é za, hkâ-nhám le kyûdûng nyi râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haí su a ngàm é tarâ agyì rayuq nyi ri. ³ Haú wâ má chuimó myhí rayuq le nyi ri. Yhang gi, haû tarâ agyì wá chyáng ê luí, 'Ngò eq amú htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyi ri.

⁴ Nghut kôlhang, tarâ agyì wá gi, ahkyíng rayoq zo jé shoq tarâ a jéyáng byí é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amú lé, ngò a jéyáng a doqdan byí é nghut le gi, yhang dum lé lé

† 17:32 Lot é yhangmyi gi, Sodom wà shut dum taû lhing wú é yanmai, Garai Gasang lhoq hten pyâm é hui sù nghut lhê.

kut mù, ngo lé myit hpêbù nhâng râ dut ri. Haû mù, ngò yhâng é amù lé jéyáng byi râ.' ga, yhâng é unghkaû má myit yu ri." gâ ri.

⁶ Haû mù luî, Yhumsîng Yesuq gi, "A ding a mán é tarâ agyì wá taî é dang mai mhoq yû keq. ⁷ Garai Gasang gi, Yhang lé nyí myín wut dîng nyi é, Yhang hkyin yu to bê bang lé, tarâ é dîng a kut byî é gi, myáng myáng nyi to râ lúhú? ⁸ Ngò, nungmoq lé taí kôlé, Garai Gasang gi, yhangmoq lé hân yhang tengmán é dîng jéyáng byi berâ nghut lhê. Nghut kôlhang, haû Byu Yhangzo jé lé é buinyi má, lumjîng hkyô lé gi, mingkan htoq má myang wú shirâ lúhú?" ga taî ri.

Hparishe Eq Kang Guq Sû Kyûdûng É Hkyô

⁹ Yhumsîng gîng lé dingmán bun luî, byù góbang lé wú tiq é bang ra-am lé, Yesuq dangtú dîng taî é gi, ¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sû nghut ri. ¹¹ Hparishe hpó gi, yap to luî, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shî kang guq sû su le, a nghut é yanmai, ngò nàng lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambûm ragambûm le kat nyi lhê.' ga luî, yhang baú yhang gotú kut dîng nyi ri.

¹³ Kang guq sû kúm gi, we we má yap to mù, mauhkûng shut lháng a wám tu wú é za, wànggàng bat luî, 'Garai Gasang ê, shî yubak dap sû ngo lé, shogyô yù laq ò!' ga dîng ri.

¹⁴ Ngò, nungmoq lé taí kôlé, kang guq sû kúm gi, Garai Gasang é hí má mara hkyut san byî é lé wó yû luî, yhûm shut dum taû lô bê; nghut kôlhang, Hparishe wá gi, a wó nghut ri. Hkâsu mù gâ le, yhumsîng gîng lé waq toq sû

ó yuq nghut kôle, lhoq nyhum pyâm é hui râ nghut lâhê; yhumsing gùng lé lhoq nyhum é sù kúm gi, waq toq é hui râ nghut lâhê." ga tái ri.

Zoshâng Wuì Lé Yesuq Shimân Byî É Hkyô

Mht 19:13-15; Mrk 10:13-16

¹⁵ Byu pé gi, zonú wuì lé Yesuq záng htung byi sháng gaq ga, Yhâng chyáng shuì lé lo bum akô. Chángzô pé gi, haù lé myàng jáng, lhom tân hkùm akô nghut ri.

¹⁶ Nghut kôlhang, Yesuq gi, zoshâng wuì lé, wut yù luì, "Haù zoshâng wuì lé, Ngá chyáng lé nhâng keq; yhangmoq lé hkâhkùm zing to kô; hkâsu mù gâ le, Garai Gasâng é mingdán gi, haù sù é bâng é mingdán ru nghut lâhê. ¹⁷ Ngò, nungmoq lé teng za tái kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haù má gè gè yhang wó wâng râ a nghut." ga tái ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haì kut ra râ lú?" ga myí ri.

¹⁹ Yesuq gi, "Haì mù, Ngo lé ge é Sará nghu lâhê lú? Garai Gasang mai lai luì, ge é ó yuq le a nyì. ²⁰ Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq. [☆] gâ é dang pé lé, nàng sé gû bê." ga luì, yhang lé tũ tái ri.

²¹ Haù yuq gi, "Haù pé banshoq lé, ngò, zoshâng hkùn mai cháng bê nghut lâhê." ga tái ri.

²² Yesuq gi, dang haù lé wó gyo jáng, "Nàng kut râ rajung râ tô ashî; nàng wó miwó lé ûng pyám luì, myùng bang lé byî pyám aq; haù jáng, nàng, mauhkûng htoq má

☆ 18:20 Htoq Ló 20:12-16

sutzè wó râ nghut lhê; haú mù, Ngá htâng lé cháng aq." ga luí, yhang lé taí ri.

²³ Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

²⁴ Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng râ matú, haú-í yhang wuî ri-nhung! ²⁵ Sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lú?" ga myí bum akó nghut ri.

²⁷ Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

²⁸ Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htâng cháng bê nghut lhê." ga taí jáng,

²⁹ Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôle, ³⁰ shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé taí ri.

Yesuq, Yhang Shí Hkám Râ Lé Dum Taí É Hkyô

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luí, myiqhtoí pé kê tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tûngbau pé é loq má ap pyâm é hui luí, haú bâng èq Yhang lé, wuizui

kut pyâm é, rhoi rip e, sôkan byé gyûn é, nhuq bat é kut yû mù, sat pyám kó râ nghut lhê. ³³ Hau htâng sum nyí nghû râ buinyi má, Yhang gi, dum dui toq lô râ nghut lhê." ga luî, yhangmoq lé tai ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haî tai nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

³⁵ Ahkuî, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri.

³⁶ Yhang gi, byù rajùm rayò sô lai ló é htê lé wó gyo jáng, haú haî dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq lai ló ri." ga luî, yhang lé tai kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má lai ló é bang gi, zim za nyi râ matú yhang lé tân hkûm akô; nghut kôlháng, yhang gi, "Dawiq é Yhangzo ê, ngo lé shogyo yù laq ô!" ga, je riyháng htê mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sû Yhâng nàm má jé lé jáng, Yesuq gi, ⁴¹ "Ngò, nàng lé haî kut byi râ ô nau ri lú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tû tai ri.

⁴² Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé tai ri. ⁴³ Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang

Yesuq htâng cháng bê. Lunglhang bang haû lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô laî lô nyi ri. ² Haú hkûn, haú wâ má, Zake gâ é kang guq agyì rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myâng nghut ri. ⁴ Haû mù, yhang gi, Yesuq lé wó myâng shoq ga, Yesuq laî lô râ hkyô hí shut din ê mù, hkohúm gâm htoq má ê doq zung tô ri.

⁵ Yesuq gi, haú jowò má jé jáng, tu wú kat luî, "Zake ê, hân gyó lô aq; hkû-nyí ngò náng yhûm má bing râ nghut lhê." ga taî ri. ⁶ Haû jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

⁷ Haû má nyi bang banshoq gi, haû lé myàng jáng, "Yhang gi, yubak dap sù rayuq chyáng bing kut râ ga wang e lô bê." ga luî, mara hûn dang taî nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byî pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taî ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰ hkâsu mù gâ le, haû Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luî, Zake lé taî ri.

* 19:9 Abraham é yhangzo nghû é lichyúm gi, Abraham su Garai Gasang lé lumjng é sù lé gâ lhê.

*Hkohkam É Dui-nhâng Zoshâng Raxê Yuq
Mht 25:14-30*

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum dông dum taí jat é gi, ¹² "Aróng wó sù byù rayuq gi, hkokhâm ayá ê hkam yù luí, dum taú lò râ ga, wê é ming shut ê râ matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí jói ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyû wui kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô naù.' ga luí, ê taí râ matú lagyo châng nhang kat akô.

¹⁵ Nghut kôlhâng, yhang kúm gi, hkokhâm ayá wó hkam yù luí, dum taú jé lô jáng, yhang ngùn ap byi tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé naú luí, yhangmoq lé wut nhang kat ri.

¹⁶ Haú hkûn, sâng-hi yuq gi, lé mù luí, 'Yhumsîng ê, ngò, náng é ngùn rajoí mai, amyat raxê jói wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, nàng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo jói wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luî, 'Yhumsîng ê, náng é ngùn rajoí lé a byuq shoq, ngò panchoq eq htup tô lhê; wú aq, shî nghut lhê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga tâi ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, nàng sê to gù nghut le nhîng, ²³ ngá ngûn lé, ngò dum taú jé lô jáng, aráng eq amyat wó yû shoq, ngùn hpún kat jang má, haî mù a kat tô é lhú?' ga yhang lé tâi ri.

²⁴ Hau htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luî, raxê joí wó sù lé jat byi keq.' ga tâi ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byî é hui shirâ nghut lhê; a wó su chyáng mai kúm gi, yhang wó tô é lé lháng, yu pyám byi shirâ nghut lhê. ²⁷ Ahkuî, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuî lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luî, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq

† 19:26 Wó sù nghu é gi, yhumsing a-tsam lé rago dat chûng sù lé taí é nghut lhê.

Behtani wà má jé ló kojáng, Yhâng é chángzo í yuq lé,
³⁰ "Nungnhik, hí mâ é wà má ê keq; wà haú má wang é
 hkûn jáng, ó le a jî wú shî é logúng zo tuí tô láng é lé, ê
 myâng kó râ nghut lhê; haú lé hpyi yù mù, Ngá chyáng she
 lò keq. ³¹ Byù rayuq yuq mai, 'Haú haí mù hpyi nyi akô?'
 ga nungnhik lé myi kôjáng, 'Shí du lé, haú Yhumsîng râ ri
 gâ.' nghû tû taí keq." ga pyîng luî, nhang kat ri.

³² Nhang kat é sù nhik ê jé lé, Yesuq taí kat é dông yhang,
 dut to láng é lé ê myang akô. ³³ Yhangnhik logúng zo haú
 lé hpyi nyi kô é hkûn, yhumsîng wuì gi, "Haú logúng zo lé,
 haí mù hpyi nyi akô lú?" ga luî, yhangnhik lé myî akô.

³⁴ Haú jáng, yhangnhik gi, "Shí du lé haú Yhumsîng râ
 ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò
 mù, yhangmoq é buhîng pé lé logúng ahtoq má buí luî,
 Yesuq lé doq ji nhang akô. ³⁶ Haú su kut, Yhang ji e ló nyi
 le, byu pé gi, yhangmoq é buhîng pé lé hkyô má hkang byî
 akô.

³⁷ Ahkuî, Tsanlun Bùm hkêgyó gyó ló é jowò eq chyáng
 lo é mai gi, chángzô pé banshoq bang, yhangmoq myang
 é laklaí kumlhá pê é yanmai, gabú myit mai htê mó o mó
 èq Garai Gasang lé hkya-on kô é dang gi,

³⁸ "Haú Yhumsîng é myîng mai jé lé lo é hkohkâm gi,
 hkungsô wó nyî sháng gaq ô![☆] Mauhkûng htoq
 má, nguîngón nyî sháng gaq ô!

Htoq tsáng myhâng má, Garai Gasang gi, hpungwup
 shingkang bo nyi sháng gaq ô!"

gâ akô.

³⁹ Haú mù luî, haú byù hpûng hkaú má bo é Hparishe
 pé ra-am gi, "Sarâ ê, náng é chángzô pé lé tân pyám aq."
 ga luî, Yesuq lé taí akô.

☆ 19:38 Hkya-on 118:26

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyí kó é nghut le gi, luqgok pé garû lô râ nghut lhê." ga tû taí ri.

⁴¹ Ahkuî, Yesuq, Yerusalem wà mó eq chyâng lò luî, wà mó haú lé myàng jáng, haú wà mó é matú ngaù mù, taí é gi, ⁴² "Wà nàng ê! Hkû-nyí lhê é buinyí má, nguingón é hkyô lé nàng bûn sé tô é nghut le gi, gè râ wá! Ahkuî kúm gi, haú hkyô lé nghop to bê nghut mù luî, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gye pé gi, awui ayàm má gyewap xuq mù, náng é lhîng hkyuq mai nang lé lom tô é buinyí jé lô râ nghut lhê. ⁴⁴ Haú hkûn, nang lé lhoq htên pyám luî, nung zo pé lé le, haú ahkaû má yhang dún nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuî, Yesuq gi, Yerusalem noqkuq yhûm má wàng mù, ung zo ung shuq é bang lé, "'Ngá yhûm gi, kyúdung yhûm dut râ nghut lhê.'[☆] ga kâ to kôlhang, ⁴⁶ nungmoq gi, jowò shí lé 'damaq hkyûng'[☆] kut akô." ga taí uchyang, hkat htoq pyâm ri.

⁴⁷ Yhang gi, nyí wuî noqkuq yhûm má mhoqshit nyi ri. Hkyangjong agyí pé, tarâ sará pé eq, byu pé é suwún wuî kúm gi, Yhang lé wó sat pyám râ hkyô ho nyi akô. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyí kô é yanmai, wó sat râ hkyô lé, a myang hô kó nghut ri.

[☆] 19:45 Esai 56:7 [☆] 19:46 Yer 7:11

20

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhê lhú? Ahko ahkáng shî, Nang lé ó yuq byî é lhú? Ngamoq lé taî kyô wú aq." ga Yhang lé myî akô.

³ Haú hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é baptisma gi, mauhkûng mai lhú? A nghut jáng, byu chyáng mai lhú? Ngo lé taî kyô wú keq?" ga yhangmoq lé myî ri.

⁵ Haú hkûn, yhangmoq chôm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haî mù, yhang lé a lumjíng kô é lhú?' ga râ nghut; ⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqhtoi rayuq ga lumjíng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tâ taî akô.

⁸ Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taî kyo." ga, yhangmoq lé taí ri.

Tsibiyiq Hkyâm Yhumsîng Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dông xoq taî kyô é gi, "Byù rayuq gi, tsibiyiq hkyâm ralhûm saí to mù, hkyâm saí zo bâng chyáng ngho byî to luî, gó ming shut myáng myáng ê nyi byuq ri. ¹⁰ Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq

chyang nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô.

¹¹ Gotû dui-nhâng zoshâng rayuq lé, yhangmoq chyang dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luî, loq kôm dum taú nhang kat akô. ¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luî, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ l hú? Ngò chyt dap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq taí lhûm bum akô. ¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ l hú? ¹⁶ Yhang gi, ê mù, haú hkyâm saí zo bang lé sat pyám luî, hkyâm haú lé góbang lé htot ngho byî pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htâng, Yesuq gi, yhangmoq lé byu wú luî, "Haú jáng gi,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'[☆] ga Chyúmdang má kê tô é gi, haí gá nau é nghut lhê l hú?

¹⁸ Luqgok* haú má gyó záng é sù ó yuq nghut kôle, gyúí

☆ 20:17 Hkya-on 118:22 * 20:18 Luqgok nghu é gi, Yesuq lé taí ri.

gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." ga tâi ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí tâi é hkyô lé, sé kô é yanmai, haú hkûn jáng lháng Yhang lé chyup yû râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyâm râ matú nghut ri. ²¹ Haú jowú bang gi, "Sará ê, nang gi, dǐng dǐng mán mán tâi mhoqshit é eq, byu é myoqdong lé a tê byî é za, Garai Gasâng é hkyô lé, tengmán é dǒng mhoqshit é sù nghut é lé, ngamoq sê lhê. ²² Hkoséng Kehta q lé, ngamoq kang kat râ gi, tarâ wang lhê lhú? A wang é lhú?" ga luí, Yhang lé myí wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tûn shit wú keq. Ó yuq é alhô eq masat laiká dap tô ri lhú?" ga myi jáng, ²⁵ yhangmoq gi, "Kehta q é nghut ri." ga akô.

Haú hkûn, Yesuq gi, "Haú nghut jang, Kehta q é lé gi, Kehta q lé byi keq; Garai Gasâng é lé gi, Garai Gasang lé byi keq." ga yhangmoq lé tâi ri.

²⁶ Yhangmoq gi, byu pê hí má, Yhâng é dang má mara a wó ho myang é eq, Yhang tû tâi é dǎng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sará ê, myiwe wó

é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. ²⁹Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luî, zo dù a dap é za shi ló byuq bê nghut ri. ³⁰Lanong yuq le, yhangmang mó é chui lé gon mù, zo dù a dap é za shi ló byuq bê. ³¹Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhâng, zo dù a dap é chyat shi ló byuq bùm bekô nghut ri. ³²Ló htáng má, myiwe myhí haú le châng shi ló byuq bê nghut ri. ³³Haú mù luî, haú dum dui toq é buinyì má, myiwe myhí haú gi, haú nhiktâng wui mâ é hká yuq é yhangmyi nghut râ lúh? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luî, Yhang lé myî wú akô.

³⁴Haú hkûn, Yesuq gi, "Shî mingkan htoq mâ é byu pé gi, ikun kut é eq myi byi myi yû kut nyi bum akô. ³⁵Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yû hkyô joq lo râ a nghut. ³⁶Haú bang gi, maumang lagyô pé su dut byuq luî, a dat shî lo kê râ nghut lhê. Yhangmoq gi, dum dui toq lô su é yhangzô pé[†] nghut é yanmai, Garai Gasâng é yhangzô pé nghut bekô. ³⁷Haú nyé duq nyi é mhanpúng eq séng luî, Mosheq èq kê tô é má lháng, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'[☆] ga bo tô é yanmai, shi é bang dum dui toq lô râ hkyô lé tún shit to bê nghut ri. ³⁸Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang

[†] 20:36 Dum dui toq lô su é yhangzô pé gâ é gi, Yesuq lé lumjîng luî, shi é htâng má dum dui toq lo é bang lé gâ lhê. [☆] 20:37 Htoq Lô 3:6

chyat nghut akô." ga yhangmoq lé tû taî ri.

³⁹ Haû hkûn, tarâ sará pé ra-am gi, "Sarâ ê, nàng taî é jô ri." ga akô. ⁴⁰ Haû mù, yhangmoq gi, Yhang lé haî le a wám myî jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htàng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taî akô lhú? ⁴²⁻⁴³ Dawiq yhang yhang lháng gi, Hkya-on Kungtôn Laiká má,

'Haû Yhumsîng Garai gi, ngá é Yhumsîng lé, "Ngò, náng é gyè pé lé,

náng é hkyî nang tanghkuq kut pyám byî é hkyíng jé shoq,

Ngá é loqyo hkyam[‡] shut zung nyì shi aq." gâ ri.[☆] ga kâ tô ri. ⁴⁴ Haû mù, Dawiq yhang lháng, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lhú?" ga taî ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé taî é gi, ⁴⁶ "Tarâ sará pé lé sidiq nyì keq. Yhangmoq gi, réng é buhîng wut chûng mù, sô yông wún luî, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poî pé mâ é je réng é zùng jowò pé má myang zùng râ lé le, ô nau nyi bum akô. ⁴⁷ Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dîng shit mhaû é bang nghut akô. Haû sù é bang gi, je riyhang htan é dông dam byî é hui zo kó râ nghut lhê." gâ ri.

[‡] 20:42-43 Loqyo hkyam nghu é gi, ahko ahkáng wó é jowò nghut lhê.

[☆] 20:42-43 Hkya-on 110:1

21

*Chuimó Myhí Kat É Alu**Mrk 12:41-44*

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haû mù, Yhang gi, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haû góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglhang lé kat bê nghut ri." ga taí ri.

*Ló Htûm Buinyì Má Dut Lò Râ Hkyô**Mht 24:1-21, 29-35; Mrk 13:1-19, 24-31*

⁵ Noqkuq yhûm lé, yúng é luqgok pê èq le, alu chyunghuq pê èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyì jé râ nghut lhê." ga taí ri.

⁷ Haû su ga jáng, yhangmoq gi, "Sarâ ê, haû nghut le gi, haû hkyô pé gi, hkâ-nhám dut lô râ l hú? Haû dut râ chyâng lò jáng, hkasû é kumlhá htoq lô râ nghut lhê l hú?" ga, Yhang lé myî akô.

⁸ Haû hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lêng é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htâng hkácháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haû hkyô pé hí dut

lò râ nghut lhê. Nghut kôlhang, ló htâng é buinyì gi, haú hkûn jáng dut râ a nghut shi." ga taí ri.

¹⁰ Hau htâng, Yhang, yhangmoq lé dum taí é gi, "Ram-yû eq ra-myû, mingdán ralhûm eq ralhûm majan zân lhûm lò kó râ nghut lhê. ¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

¹² Nghut kôlhang, haú hkyô banshoq a dut shimá, Ngá mying é yanmai, byu pé gi, nungmoq lé chyup yû luí, zing-rî yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pê chyáng ê ap byí é le, hui kó râ nghut lhê. ¹³ Haú su é pé mai, nungmoq gi, ngò eq séng luí, saksé wó hkám râ hkyô htoq lô berâ nghut lhê. ¹⁴ Nghut kôlhang, hkâsu nghû lhom tû taí râ hkyô lé, hí mai a myit wú nyì râ lé, nungmoq myit hpyit to keq. ¹⁵ Hkâsu mù gâ le, nungmoq é gye pé lhunglhâng bang, haí le a wó lhom tû taí loshoq, ngò, nungmoq lé dang eq hpaqchyí byi râ nghut lhê. ¹⁶ Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui èq lháng, ap pyâm é hui kó râ nghut lhê. Yhangmoq gi, nungmoq chyáng mâ é ram lé lháng, sat pyám kó râ nghut lhê. ¹⁷ Byù lhunglhâng bang gi, Ngá é yanmai, nungmoq lé a nguì kut kó râ nghut lhê. ¹⁸ Nghut kôlhang, nungmoq é xâm rahkat lháng wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gyè hpúng mó èq lóm tô é lé, nungmoq myàng jáng, wà mó haú htên byuq râ ahkýng chyâng lò bê lé, bûn sê nyì keq. ²¹ Haú hkûn lé, Yuda mau má nyi é bang gi, bùm pé shut hpang doq ló kó sháng gaq;

* 21:18 Shí má gi, asak woi-nyí a shí râ hkyô lé taí é nghut lhê.

haû wà hkaû má nyi é bang le, hpang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gâ le, Chyúmdang má kê to má kê to banshoq dik lò râ matú, buinyi haú pé gi, mara dam byi é buinyi pé dut râ nghut lhê. ²³ Haû buinyi pé má, zogûng dut é myiwe wui eq naú huq ashî nghut é înu wui gi, gyai yhang wuîhke kê râ nghut lhê; hkâsu mù gâ le, shí ming ahtoq má wuîhke mó eq, shí amyú ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, shâm lhâm èq sat pyám hui lhê eq, ming hkang ming mó má chyup shuî lô é le hui kó râ nghut lhê. Tûngbaù pé lé byi tô é buinyi ahkyíng htáng shoq, Yerusalem wà mó gi, tûngbaù pé èq nâng zik tô é hui râ nghut lhê.

²⁵ Haû hkûn, bui, kyî, lhamó pé má, kumlhá htoq shit râ nghut lhê. Wuishuq lung-aû mâ é wuîlhêng pé é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kê é yanmai, moq byuq lô bûm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huî bûm kê râ nghut lhê. ²⁷ Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkan mó eq le, gyó lé lo é lé, yhangmoq byu-myàng kó râ nghut lhê. ²⁸ Haû hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri." gâ ri.

²⁹ Yhang, yhangmoq lé dangtú dông xoq taî é gi, "Maihpáng gâm eq sigâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luî, nungmoq yhang dat wú sê akô. ³¹ Haû eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé,

nungmoq sé lo keq.

³² Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³³ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

³⁴ "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pê èq, nungmoq é i-myt wò laí nyî luí, haú ngò jé lé é buinyì gi, lhaí bik lo é su, nungmoq ahtoq má byodàn tung a jé lò sháng gaq, sidiq nyè keq. ³⁵ Hkâsu mù gâ le, buinyì haú gi, mingkan htoq má nyi é byù banshoq bâng é ahtoq má, haú su jé lô râ nghut lhê. ³⁶ Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhâm le kyûdung luí, ahkyíng hkangmó má machya nyè keq." gâ ri.

³⁷ Yesuq gi, nyí wuî noqkuq yhûm má mhoqshit nyî luí, myìn wuî Tsanlun Bùm gâ é bùm shut htoq ê mù, ê nyi to to kut ri. ³⁸ Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuî, Lhoqlhai Poî gâ é Azuma (múnchi a kat é Muk Zo Poî) jé râ chyâng lò bê. ² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wui lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí, ⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau

pé eq, ê hpyê ri. ⁵ Haû mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyì bê nghut ri.

Lhoqlhai Poì Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haû Lhoqlhai Poì mâ é sauzo shigu hkungga sat nhông byi râ é Azuma buinyì jé bê. ⁸ Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poì ê món láng keq." ga luí, nhang kat ri.

⁹ Haú nhik gi, "Hkâmá ê món to nhâng nau ri lú?" ga luí, Yhang lé myí akô.

¹⁰ Haú hkûn, Yesuq gi, "Nungnhik, myuq hkaû shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhùm má châng wàng mù, ¹¹ yhumsîng lé, 'Ngò Ngá é chángzô pé eq rahá, Lhoqlhai Poì zo râ bíng wap hkâmá nghut lhê lú ga, Sará myí nhang kat ri.' nghú táí keq. ¹² Haú hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haú má ê món to keq." ga taí kat ri.

¹³ Haú chángzo nhik htoq e ló le, Yesuq táí kat é eq roq za ê myâng kômù, Lhoqlhai Poì lé món to bekô nghut ri.

Yhumsîng É Myinzang

¹⁴ Ahkuí, ahkýng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poì shí lé nungmoq eq rahá zo râ lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé táí kôlé, Garai Gasâng é mingdán má poì shí a ló dik dik gi, ngò haû lé dum zo râ a nghut ló." ga luí, yhangmoq lé taí ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yhangchang gàm shuq

lhum keq. ¹⁸Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo." ga taí ri.

¹⁹Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shí gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shí su kut nyí keq." ga taí ri.

²⁰Haû eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹Nghut kôlhang, wú keq, Ngo lé ap pyám râ sù gi, zang bó shí má ngò eq rahá nyi tô ri. ²²Haû Byu Yhangzo gi, hkyin to huí é eq rajung za shí râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri. ²³Haû su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhu ga, rayuq eq rayuq myí lhum bum akô.

²⁴Haû htoq agó, yhangmoq mâ é hká yuq sheq je kô lhê lhu ga le, rayuq eq rayuq taí htîng lhûm bum akô. ²⁵Haû mù luí, Yesuq gi, "Tûngbaù pê é hkohkam pé gi, yhangmoq byù myû pê é ahtuq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô. ²⁶Nungmoq kúm gi, haû su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷Hká yuq sheq je kô lhê lhu? Zô zung nyi sù lhu? Haû a nghut jáng, saí tsô é sù lhu? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê. ²⁸Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹Haû su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê. ³⁰Haû mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq

le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungso cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjínq myit a hten sháng gaq nghû, Ngò, náng é matú kyûdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq." ga tái ri.

³³ Haú hkûn, Simun gi, "Yhumsîng ê, htóng wâng kôlhang, shî kôlhang, ngò gi, nàng eq rahá cháng râ matú myit hpyit to bê." ga tû tái ri.

³⁴ Yesuq gi, "Petruq ê, nang lé Ngò tái lé, hkû-nyí* lhang woq a tûn shi má, nàng, Ngo lé a sé ga luí sum dâm he-ngik pyám râ nghut lhê." ga tái ri.

³⁵ Hau htâng, Yesuq, yhangmoq lé tái é gi, "Ngò, nungmoq lé ngunhtûng, jihtûng, hkyî-tsung a wùn a chûng nhang é za, nhang kat é nghut hkûn, nungmoq chyáng hái ra akô lú?" ga myi jáng, yhangmoq gi, "Hái le a ra lo." ga tái akô.

³⁶ Haú hkûn, Yhang gi, "Ahkuí kúm gi, ngunhtûng wó sù gi, yù wun sháng gaq, jihtûng wó sù le, yù wùn sháng gaq, shâm a wó sù gi, bumó ung luí wui sháng gaq. ³⁷ Hkâsu mù gâ le, Ngò, nungmoq lé tái kôlé, Ngò eq séng luí Chyúmdang má kê tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.'[☆] ga kê tô é dang gi, Ngá chyáng dik lò râ nghut lhê." ga luí, yhangmoq lé tái ri.

* 22:34 Yudaq byu pê é ra-nyí gi, myinhâng búi wang é mai, htang nyí búi wang é jé shoq nghut lhê. Shí mã é hkû-nyí gi, nga-nhûng é matú myín âng ri. ☆ 22:37 Esai 53:12

³⁸ Haû mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

Tsanlun Bùm Má Yesuq Kyûdûng É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haú jowò má jé jáng, Yhang gi, "Nungmoq, gunglaú é a hui sháng gaq, kyûdûng nyì keq." ga luí, yhangmoq lé taí to mù, ⁴¹ chángzô pé nyì é mai luqgok radú we kô gâng e ló luí, hkyihput htuq mù, ⁴² "Áwa ê, Náng ô nau é nghut le gi, góm† shí lé Ngá chyáng mai lhaí pyám byi laq. Nghut kôlhang, Ngò ô nau é dông a nghut, Nàng ô é dông sheq nghut sháng gaq." ga kyûdûng ri. ⁴³ Haú hkûn, mauhkûng mai maumang lagyo rayuq htoq lé luí, Yhang lé i-myt nhik lé taí tîng ri. ⁴⁴ I-myt hkaú má dik shoq hkâm zo wuí é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haû mù, kyû ban dung jáng, Yhang toq luí, chángzô pê chyáng ló wú le, yhangmoq gi, myit yón mù luí, yhup myhî to kô é lé ló myâng mù, ⁴⁶ "Haî mù yhup nyi akô l hú? Toq keq! Gunglaú é a hui sháng gaq, kyûdûng nyì keq." ga luí, yhangmoq lé taí ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haú su ga, ru taí nyi ashí le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri. ⁴⁸ Haû mù luí, Yesuq gi, "Yudaq ê, nàng gi, haú Byu

† 22:42 góm gâ é gi, Yesuq jamjau hui râ hkyô eq shí râ hkyô lé, taí nau é nghut lhê.

Yhangzo lé bopuq puq é èq gyè pè chyáng ap pyâm lhê lhuú?" ga luí, yhang lé lhom myí ri.

⁴⁹ Haú hkûn, Yesuq htâng cháng bang gi, haí dut lò râ lé bûn sé kô é yanmai, "Yhumsîng ê, ngamoq gi, sham èq zân le, gè râ lhuú?" ga myí akô. ⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tû taí mù, haú yuq é nohkyap lé ê záng luí lhoq gê byí ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuí lé, "Nungmoq gi, damyaq rayuq lé chyup é su, shâm, dum-báng eq kut luí, lé lo akô lhuú? ⁵³ Ngò gi, nyí wuí, noqkuq yhûm má nungmoq eq rahá nyí kôlhang, nungmoq Ngo lé chyup yû râ ga a hen wú kó; ahkuí gi, mauchut èq up[‡] nyi bê yanmai, nungmoq é ahkyíng nghut nyi ri." ga taí ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuít wang ló akô. Petruq le we we mai châng tô ri. ⁵⁵ Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyí sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo

[‡] 22:53 Mauchut èq up gà é gi, Tsadán èq up é lé gà ri.

nyì sù nghut ri." ga tái kat jáng, Petruq gi, "Byù hpó ê, ngò a nghut." ga tũ tái ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq tái ri.

⁶⁰ Petruq gi, "Byù hpó ê, nàng tái nyi é hkyô lé, ngò a sé." ga tũ tái ri. Haù su ga ru tái nyi ashì le, woq tũn bê nghut ri. ⁶¹ Haù hkũn, Yesuq gi, lɦĩng luĩ, Petruq lé wú kat ri. Haù mù, Petruq gi, "Hkũ-nyĩ lɦĩng, woq a tũn shi má, nàng Ngo lé sum dãm he pyám rã nghut lhê." ga luĩ, Yhumsĩng yhang lé tái é dang lé bũn kat ri. ⁶² Haù mù, yhang gi, shinggan shut htoq ê luĩ, gyai yhang ê ngau nyi ri.

Gyezô Pé Yesuq Lé Rhoĩ É Hkyô

⁶³ Yesuq lé zũng nyi é bang gi, Yhang lé rhoĩ luĩ nghap myĩng nghap htê mu nyi akô. ⁶⁴ Yhangmoq gi, Yɦĩng é myoqdong nghop pyám byi luĩ, "Nang lé bat sũ gi, ó yuq nghut ri lɦũ? Myiqhtoi htoĩ wú aq." ga myĩ akô. ⁶⁵ Yhangmoq gi, Yhang lé nyhap é dang ajung jung dũng tái rhoĩ nyi akô.

Suwún Wui É Hĩ Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyũ wui é suwún hpúng bang eq rahá, hkyangjong agyi pé, tarã sarã pé, zup hpong kut nyi é má, Yesuq lé shuĩ ê mù, ⁶⁷ "Nàng Hkrisduq nghut é tẽng le gi, ngamoq lé tái kyo laq." gâ akô.

Yesuq gi, "Ngò gi, Hkrisduq nghut lhê nghũ tái kôlhang, nungmoq jĩng kó rã a nghut. ⁶⁸ Ngò, nungmoq lé myi kôlhang, nungmoq gi, tũ tái kó rã a nghut. ⁶⁹ Nghut kôlhang, ahkuĩ mai haũ Byu Yhangzo gi, a-tsam bo dik é Garai Gasãng é loqyò hkyam má wó zung nyi berã nghut lhê." ga luĩ, yhangmoq lé tái ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lú?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tû taí ri.

⁷¹ Haú hkûn, yhangmoq gi, "Nga-nhúng haí jung saksé wá râ nyi ashí lú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

⁴ Pilat gi, "Shí yuq lé hûn râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haú bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri. ⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhú lhum kut shit râ lé, wó myâng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹ Haû mù, yhang gi, Yesuq lé dangmyi myo myô èq myî wú kôlhang, Yesuq gi, dang rahkun lhang a tû táí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoí jihkyoí kut mù, atam é dông táí hpoí kô luí, réng é mebu hut byi mù, Pilat chyáng dum taû dé nhang kat akô. ¹² Haû nyí jáng, hí hpyang gyè dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39—19:16

¹³ Haû hkûn, Pilat gi, hkyangjong agyi pé eq zau suwún wuî, mingbyû wuî lé wut tsîng to mù, ¹⁴ "Shí yuq gi, mingbyû wuî lé hkyô shuî nghoq ri ga, Yhang lé nungmoq ngá chyáng shuî lé lô bekô. Ahkuí, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nga-nhûng chyáng dum dé kat byi bê nghut ri; haû mù luí, wú keq, shí yuq gi, shí gíng é mara haí le a kut shut nghut ri. ¹⁶ Haû mù, ngò, Yhang lé dam byi luí, nhang pyám râ." ga luí, yhangmoq lé taí ri.

¹⁷ Nghut kôlhang, Lhoqlhai Poí hkangmó má, Pilat gi, mingbyû wuî lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. ¹⁹ Barabaq gi, wà htum má gumlau kut é eq byû sat é yanmai, htóng gyó nyî sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq taí ri. ²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garû nyi bum akô.

²² Haû mù luí, sum dâm nghû râ hkûn, Pilat dum taí é gi, "Haí mù luí lhu? Yhang gi, hai mara kut shut bê lhu? Yhang má shî gîng é mara lé ngò a myàng, haû mù, ngò, Yhang lé bat, nhuq, mhoqshit luí, nhang pyám râ." ga luí, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dîng wut nyi akô nghut é yanmai, wó taí ung yù bekô nghut ri. ²⁴ Haû mù luí, Pilat gi, yhangmoq dîng é eq rajung za myit hpyit doqdan byí ri. ²⁵ Haû su mù, yhang gi, yhangmoq dîng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má cháng nhang akô. ²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri. ²⁸ Yesuq gi, yhangmoq shut lhîng wú luí, "Yerusalem byizo wuì ê, Ngá é yanmai hkâ-ngau nyi kó, nungmoq gi, yhumsing gûng eq yhumsing é zo dù wuì é matú sheq ngau nyi keq. ²⁹ Hkâsu mù gâ le, 'Zogûng a dut wú é eq nau a huq wú é baùdung myhí pé gi, hkungsô wó nyi ri.' ga luí, taí é buinyi gi, jé lô râ nghut lhê. ³⁰ Haú buinyi má, byu pé gi, bùm pé lé,
'Ngamoq ahtoq má byoq nhé aq!'

ga luî le, kong pé lé,

'Ngamoq ahtoq má nghop aq!'[☆]

ga luî le, wut taî bùm bekô râ nghut lhê. ³¹ Byu pé gi, sikgâm jûm tô ashî le isu kut kô é nghut le gi, màn jáng gi, hkâsu wá dut lò râ lhú?" ga taî ri.

³² Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô. ³³ Ahkuî, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luî tapzîng má jén tap tô akô. ³⁴ Haú hkûn, Yesuq gi, "Âwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taî ri. Gyezô pé gi, Yhâng é mebu pé lé lháng, hkyîn shosé she é dông gam yu pyám byî akô.

³⁵ Mingbyû wuî gi, yap to mù tu wú nyi akô. Zau suwún wuî Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huî ê mù, rhoî nyaú nyaú akô. Yhangmoq gi, chyîn wing lé yhun byi kôluî, ³⁷ "Nàng gi, Yudaq byu pê é hkohkâm nghut é nghut le gi, Náng gûng yhang nàng, hkyi yu wú aq." ga Yhang lé taî akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huî é damyaq rayuq gi, "Nàng gi, Hkrisduq nghut lhê, a nghut lhú? Haú Náng gûng nàng le, ngá-nhik lé le, hkyi yù aq." ga luî, Yhang lé rhoî ri.

⁴⁰ Damyaq góyuq sù kúm gi, "Nàng le shî yuq eq rajung za jén tô é hui luî nhîng, Garai Gasang lé a gyuq lhú?"

[☆] 23:30 Hos 10:8

⁴¹ Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luî, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu* má nyí râ nghut lhê." ga luî, yhang lé tû taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luî, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó èq garû kat ri. Haú su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luî, Garai Gasang lé hkya-on kungton ri. ⁴⁸ Haú hkyô lé wú râ ga, lé zîng tô é byù lhunglhâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô. ⁴⁹ Nghut kôlhang, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

* 23:43 Hparadisu nghu é gi, mauhkûng mingdán lé taí ri. † 23:44 Nga-nhûng é nyí káng raxe í hkyíng gi, Yudaq byù pé é napkýó hkyuq hkyíng nghut lhê; yhangmoq é gau hkyíng gi, nga-nhûng é myinhâng sum hkyíng nghut bê.

Yesuq É Màng Lé Lup Hkaû Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luî, ⁵¹ yhang gi, Yudaq uphkâng hpúng mâ é rayuq nghut kôlhâng, hpyé lhùm é hkyô má le, zui saí é hkyô má le, myit a bo huî lom é sù nghut ri. ⁵² Yhang gi, Pilat chyáng wàng luî, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luî, pán yúng eq htup yup mù, ó lé lháng a kat wú shî é, luqgok lé kyûng tô é luqgok lup hkaû má kat tô ri. ⁵⁴ Haú nyí gi, Hên Lajang Buinyì nghut luî, Bánno buinyì jé râ za nghut bê.

⁵⁵ Galile mau mai Yesuq eq rahá htoq lé lo é miywe zo wuî le, Yosep htâng má châng ê luî, lup haú lé le, Yesuq é gungsôm lé le, hkâsu kut tô tô é lé, ê myang akô. ⁵⁶ Hau htâng, yhangmoq gi, yhùm shut taû lò mù, Yesuq é gùng sôm lé but byi râ matú, namngón é jung eq mura xû lé hen tô akô. Bánno buinyì má kúm gi, tarâ joq é eq rajung za, yhangmoq yuban bán nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyì htang napsûn noq le, miywe wuî gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup mâ é luqhkum lêng bóng to lánng é lé, ê myâng kômù, ³ wang e wú kô le, haú Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. ⁵ Haú mù, miywe haú bang gi, gyuq

dan bum kôluî, myigùng shut myoqdong ngóm gop tô bum é u lé, haú nhik gi, "Nungmoq gi, duì sù lé, shi to bâng chyáng haí mù ho nyi akô l hú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé, ⁷ 'Haú Byu Yhangzo gi, yubak dap bâng é loq má ap pyâm é hui luî, tapzîng má jén sat to huî é htâng, sum nyi nghû é buinyi má lhoq dui toq yu é hui râ nghut lhê.' ga nungmoq lé taí tô é dang lé myit bun keq." ga luî, yhangmoq lé taí ri. ⁸ Haú hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taû lò mù, lagyo raxe rayuq eq gotû lhunglhang bang lé, haú hkyô banshoq lo taí kyô akô. ¹⁰ Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô. ¹¹ Lagyô pé kúm gi, yhangmoq é dang lé dangsôm su ngam pyám kôluî, a jîng byi kó nghut ri. ¹² Nghut kôlhang, Petruq gi, toq luî lup má din jé ê mù ngóm wú kat le, mâng htup é pán leq tô é lé za myàng mù luî, haú su dut é hkyô lé maú é eq, yhûm shut dum taû lô byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haú ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. ¹⁴ Yhangnhik gi, dut laí lô é hkyô pé banshoq lé, rayuq eq rayuq taí lhûm nyi akô. ¹⁵ Yhangnhik gi, haú hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byî é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô l hú?"

ga myi kat jáng, yhangnhik gi, myoqdong shûm kut luî, hkyîng yap tô akô. ¹⁸ Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyî luî nhîng, shí gyoro lé haû wà má dut lo é hkyô pé lé, a sê é bíng gi, Nàng baú za wá nghut lhê lú?" ga myi kat ri.

¹⁹ Yhang gi, "Haî jung lú?" ga dum myî é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lhunglhang bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui èq haú yuq lé sat pyám râ matú ap byî pyám kômù, yhangmoq gi, Yhang lé tapzîng má jén sat pyám bekô nghut ri.

²¹ Ngamoq kúm gi, haú yuq lé, Israelaq byù myû lé hkyi yù râ sù nghut lhê nghû luî, myit myoqbyu nyi bum lhê. Nghut kôlhang, haû su dut lâi lô é gi, hkû-nyî sum nyî lháng bò bê. ²² Hau htoq agó, hkû-nap noq le, lup má é wú é, ngamoq hpúng mâ é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taû lò mù, 'Haû Yhumsîng dui nyi ri.' ga luî, taî kyô é maumang lagyo htoq shit é shing-rán lé, myang é hkyô lé lo taî kyô akô. ²⁴ Haû mù, ngamoq é luzúm wui ra-am gi, lup má é wú kô le, myiwe wui taî é eq rajung za, dut to lánng é lé é myàng akô. Nghut kôlhang, haú yuq lé gi, yhangmoq a myàng kó gâ." ga luî, Yhang lé taî kyô akô.

²⁵ Haû hkûn, Yhang gi, "Myiqhtoî pé taî é dang banshoq lé lumjîng râ matú, hpaqchyî a bo é eq ngha é sù nhik ê, ²⁶ Hkrisduq gi, haû su é wuîhke jamjau hkâm zô yu é htâng má sheq, Yhâng é hpungwup shîngkang má wó wang nyi to râ, a nghut kó lú?" ga luî, yhangnhik lé myî ri. ²⁷ Yhang gi, yhangnhik lé, Mosheq kê tô é eq myiqhtoî pé banshoq bang kê tô é Chyúmdang pé mai, Yhang má

âng é dang banshoq é lichyúm lé, taî hpông kyô ri.

²⁸ Ahkuî, yhangmoq, haú nhik e ló é wà má chyâng lò kôjáng, Yesuq gi, laî ló râ su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luî, Yhang lé wum kat chôm lung nyi akô. Haú mù luî, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luî, jeju hkya-on mù, myhik hpé luî, yhangnhik lé gàm byî ri. ³¹ Haú hkûn, yhangnhik é myoq bóng lô luî, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myt unghkaú má, achyí aku dut bê a nghut l hú?" ga luî, yhangnhik yhangchang taî lhûm akô.

³³ Yhangnhik gi, toq mù, radá dâm Yerusalem wà mó shut dum taú ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô. ³⁴ Haú bang gi, "Haú Yhumsîng gi, teng za yhang dum dui toq ló bê; Simun lé l háng htoq shit bê nghut ri." ga taî lhûm nyi bum akô. ³⁵ Haú hkûn, yhangnhik gi, hkyô má dut laî ló é hkyô pé eq, muk hpê é hkûn má Yesuq lé bûn sé kat é hkyô lé, taî kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taî nyi tô bum ashî le, Yesuq gi, Yhang gûng yhang, yhangmoq é agùng má yap to luî, "Nungmoq nguingón yuqyo nyi sháng gaq." ga luî, yhangmoq lé taî ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luî,

Yhang gi, "Nungmoq gi, haî mù dan nyi bum akô lúú? Haî mù nungmoq é i-myait unghkaû má úng-âng nyi bum akô lúú? ³⁹ Ngá é loq eq Ngá é hkyî lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luî, yhangmoq lé taî kyô ri.

⁴⁰ Yhang gi, haû su ga taî mù, Yhâng é hkyî loq lé tân shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lúú?" ga luî, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byî akô. ⁴³ Yhang gi, haû lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taî é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luî kê to má kê to banshoq gi, dik râ chyat nghut lhê nghû luî, nungmoq eq rahá nyi to ashî hkûn lé, Ngò, nungmoq lé taî kyô tô é pé gi, shî nghut bê." ga taî ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myait hkum hpóng byî ri. ⁴⁶ Haû mù, Yhang gi, "Hkrisduq gi, wuîhke jamjau hui zo mù, sum nyí nghû râ buinyì má, shi é mai dum dui toq lô râ hkyô lé le, ⁴⁷ Yerusalem wà mó mai hî luî, byù myû chângjup lé, Yhâng é mying lé lang luî yubak mara hkyut pyám byi râ hkyô eq myit lhing râ hkyô lé le, hko kyo râ hkyô lé, kê to bê nghut ri. ⁴⁸ Nungmoq gi, shí pê é saksé pé nghut nyi akô. ⁴⁹ Ngá Wa byî tô é danggidiq* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq,

* 24:49 Ngá Wâ byi tô é danggidiq nghu é gi, Chyoiyúng é Woi-nyí lé taî ri.

Yerusalem wà mó má láng nyî keq." ga luî, yhangmoq lé taî ri.

Yesuq Mauhkûng Shut Shuî Toq Yu Huî É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuî htoq ê mù, Yhâng é loq tu toq luî, shimân byî ri.

⁵¹ Haû su kut shimân byî nyi ashî le, Yhang gi, yhangmoq chyáng mai gâng ló byuq luî, mauhkûng shut shuî toq yu é hui bê nghut ri. ⁵² Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû ló akô. ⁵³ Yhangmoq gi, noqkuq yhûm má nyi to mù, Garai Gasang lé hkyá-on kungton nyi bum akô nghut ri.

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 23 Oct 2018 from source files dated 23 Oct 2018

23f9fc55-a8a4-59ef-9513-707ec336b0ee